

邊東 南防守利便
紀

叢書集

初編

王主
五者
雲端

商務印書館發行

東南防守利便



3 0646 4873 0

著若吳 克陳
編 祕 吕

本館叢書集成初編所選
學海類編及藝海珠塵皆
收有此書學海本在先故
據以排印

進東南防守利便狀

左朝奉郎直龍閣閣權發遣建康軍府主管江南東路安撫司公事臣呂祉狀臣建炎三年夏待罪右正言嘗建議謂當以建康爲根本淮甸爲藩籬連接沿江措置庶幾可以立國紹興元年冬待罪湖南提刑建議謂荆楚迺本朝上游宜於沿江措置使與吳會相接庶幾可以一統東南去年夏蒙恩除淮南宣撫使司參議具奏辭免謂屯兵淮甸表裏雖一而上下不接如人之一身四體不備楊幺在荆楚乃胥首瘞瘞他日恐資敵國宜亟掃除宿兵以固上游之勢冬蒙恩除知建康府赴內殿奏事又論今日之事謂當先定其規模先爲不可勝以待敵之可勝其說亦歸於沿江上下表裏之勢前後論奏副本具存然臣已見如是而已臣自到今任每與僚屬文學之士榷略茲事取漢魏以來方策所載山川險阻道里遠近軍馬屯戍之地爭戰勝敗之事裒集類次命本府通判吳若安撫司淮備差遣陳克董其事作東南利害總論以襄陽江陵武昌九江皆建康上游也上下之勢要在相接作江流上下論北則合肥壽春盱眙廣陵皆其表也表裏之勢又當如一作江淮表裏論今圖恢復必據要會以爲根本建康實中興根本之地作建康根本論誠以駐蹕建康則沿江戍守不可不備城池不可不修宮室不可不營郊廟不可不立河渠不可不議故自六朝建都以來沿江戍守城池宮室郊廟河渠事迹悉以類舉南北之事盡此矣臣愚謂今爲吾南國之患者有三一曰金賊二曰僞齊三曰楊幺皆吾三敵也臣近探到東北調兵俱向陝西則

窺吾四川矣。李成據襄陽，陰遣人結楊玄，則扼吾荆楚矣。宿亳修城，順昌聚糧，近又城渦口，乃是曹公伐吳入淮路。此其計不淺，則又動搖吾淮甸矣。當四川者，吳玠、關師古當荆楚者，王燮而已。至於淮甸，則未有當之者。雖有當之者，又不可恃。雖有可恃者，又左右無援，則是形勢閒斷，上下無備，表裏不一，其何以立國？臣請以三國之事驗之。魏有荀彧，蜀有諸葛亮，吳有魯肅，皆一時之傑也。荀彧說曹操，則曰先取河北，南臨荊州，諸葛亮說劉備，則曰跨有荆益，保乎險阻者，其意各在吞吳，故不得不窺荊州也。至孫權都江左，荊州乃其上游，尤當力爭，故魯肅說之曰：「荊州與國鄰接，據而有之，天下可定。」及曹操破荊州，順江東下，則遣周瑜逆擊，劉備領荊州牧，則命諸葛瑾從備求之，而又躬擐甲冑，與魯肅、呂蒙、陸遜輩數十年閒，以死拒戰，而荊州要地，卒爲吳有。魏不復南渡，蜀不敢東下者，以不失上流之勢也。及吳之衰，晉圖平之，羊祜首建議，謂必藉上流之勢，若引梁益之兵，水陸俱下，荊楚之衆，進臨江陵，平南豫州，直指夏口，徐揚青兗，並向秣陵，是以一隅之吳，當天下之衆，其後王濬、唐彬、胡奮、王戎、輩并吞席卷，順流長鷺，直造秣陵，悉如祜策，而吳遂亡。然則荊州豈可失也？一失荊州，江左難立矣。臣又以周唐之事驗之。南唐雖跨據江左，止能奄有淮甸，每冬淮水浸涸，常發兵戍守，謂之把淺。吳廷紹以疆場無事，坐費資糧，悉罷之。劉仁贍、上表固爭不勝，及周世宗圖淮甸，諸將欲據險以邀周歸師，宋齊邱曰：「如此則怨益深，不如縱之以德於敵，乃命諸將各自爲守，毋得擅出擊周師。」由是暮春之圍益急。自劉仁贍失守之後，周師乘勝，水陸俱發，唐之君臣，無以爲計，相視悲泣，始獻江北之地，而江左有歟寒之憂矣。及我藝祖受禪，再定淮甸，江

左之勢愈孤。雖於沿江繕城壘，聚甲兵，厚方物之貢以緩師，遣匈奴之使以求援，竟無益於救敗。而江南途平，然則淮甸豈可失也。一失淮甸，江左難立矣。故爲朝廷之計，宜亟圖之，不可以遣使待報之故，因循廢日，以墮其計也。今時氣未振，難以議戰征，但當謹守封疆，以戒不虞。如沿江一帶，自襄陽、江陵、武昌、九江而下，淮南諸郡，如合淝、壽春、盱眙、廣陵等處，各屯兵馬，西與四川形勢接聯，使上下有備，表裏如一，庶幾可與抗衡。進可以禦敵，退可以堅守。雖未剪除兇逆，混一寰區，而南北之勢成矣。自魏而下，定都江左，其間有志於中原者多矣。時有所未可，祇取禍敗者，非止一事。宋文帝元嘉中，欲經略中原，羣臣爭獻計策，迎合取寵，獨沈慶之以爲不可。時文帝以謂虜所恃者惟馬，今下水浩汎，河道流通，汎舟北下，礪磽必走，滑臺少戍，守可覆拔，克此二城，館穀弔民，虎牢洛陽，自然不固。比及冬初，城守相接，虜馬過河，卽成禽也。初，魏羣臣聞有宋師言於魏主，請遣兵出，魏主曰：「馬今未肥，天時尚暑，速出必無功。若兵來不止，且還陰山避之。」展至十月，吾無憂矣。王元謨圍滑臺，初措畫乖繆，衆心失望，數月不下。魏人潛遣人撫慰，遂擁兵渡河，衆號百萬，鼙鼓之聲，震動天地。元謨始懼，走而魏師長驅，宋人肝膽塗地矣。此往事也，可以爲輕舉之戒。今僞齊不難平，大梁不難復，正恐禍根未除，貽患在後耳。兵家之勢，先度彼已。虜人深歸巢穴，自河以北，所至留一二酋領，雜契丹九州人鈐制吾之赤子，其強弱虛實，不得知也。而河之南，付之僞齊，使爲吾之敵，駐蹕臨安，僻在海隅，諸將重兵屯江左，皆相去遠矣。以臣觀之，必得其強弱虛實，而後可圖。必於沿江一帶，措置□□，而移蹕向前，然後可以係東南離散之心，慰西北來蘇之望，振作士氣，以待天命。

其舉事也。自非精銳之師。直擣其心腹。前者克勝。後者相繼。一時過河。使聲實兼舉。則事未必濟。而今日之勢似有未可。故剪除兇逆。混一區宇。臣謂其未能。而南北之事。臣恐其當爲也。臣聞事君之義。犯而勿欺。今北路未夷。國威未振。中夜以思。不寒而慄。矧臣嘗蒙眷擢。列諫省薦。歷外臺。今又爲藩臣。督思所以圖報。事係大體。無以逾此。故數不量力論之。所有吳若、陳克所著南北事迹。釐爲三帙。目之曰東南防守利便。謹令繕寫。隨狀進呈。伏惟睿旨俯垂省覽。如合聖意。乞早賜施行。臣不勝昧死謹錄奏聞。伏候勅旨。

東南防守利便上

宋右迪功郎江南東路安撫使司準備差遣臣陳克進

宋左宣教郎添差通判建康軍府提舉圩田臣吳若

宋呂祖謙

東南利害總論

自古中興之業，惟周宣王、漢光武爲能恢復混一。以還祖宗之舊。如先主之造蜀，而天下因以三分。晉元帝之渡江，四海一家，裂爲南北。其小大強弱，若不相似，然其規模之廣狹，必素定焉。如是而王，如是而霸，謀而行之，至於成功，未聞依違於兩間，徵倖於一切，而能以有爲也。自金人作難，中原蕩覆，國家權時之宜，狃于南士，僞豫小子，僭據京縣，此三分之時邪？南北之勢邪？明此，則恢復混一可得而言矣。夫廟堂之規摹，其數定與否，不可得而知也。區區之見，竊有惑焉。自建炎之初，車駕幸淮，三年夏，幸臨安，五月，幸建康，其年秋，幸會稽，後二年，再幸臨安，則是都邑之遷徙，未聞有定居也。中閒嘗用留守之兵，欲率勵羣盜，復收趙魏，幾何而輒罷。又嘗以宰相都督諸軍議，遣大將欲涉淮以趨宿泗，俄而中輶，又嘗令李橫、牛皋、破穎昌，欲直擣汴京，而亦卒無所成。則是進取之前郤，未聞有定論也。夫規模不素定，欲爲三分爲南北，猶不可必，況於恢復而混一乎？爲今之計，必先定都邑以固根本，而後定進取以復境土。規模已定，斷之以不惑，持之以不倦。人旣信之，天且助之。夫豈有不成之功乎？且周宣王之興，實起於東都，漢光武之烈，

實本於河內。建康之形勢。其地險於維揚。而其勢便於會稽臨安。是亦今之東都河內也。誠建都於此。以爲興王之基局。而後按地形之表裏。極江流之上下。以謀進取。可也。且淮甸者。江左之表也。九江、武昌、江陵、襄陽者。建康之上游也。孫氏不能舉淮南。劉氏不能有荊州。故卒與魏人三分而守之。此無他。時之不便故也。及晉之東。兼淮南。并巴蜀。包荊襄。而家於建鄴。南北之權均矣。而亦不能有荊州。滅劉氏以取京洛。此無他。德之不修故也。今誠能宿重兵於盱眙、廣陵。以瞰齊魯。開外藩於合肥、壽春。以躡陳許。控帶九江、武昌。以奄有楊越。鎮撫荊南、襄陽。以應接川陝。若然。則地形之表裏。并包爲一。江流之上下。首尾相應。進而可以混南北矣。方且舉賢用能。信賞必罰。勤政以厚其民。節用以阜其財。選將以練其兵。深謀蓄力。與人待時。順天之道。乘敵之釁。一舉而清中原。恢復混一。尚庶幾及見之。要在於規模素定而已。凡建康之根本。江淮之表裏。江流之上下。其詳旣載之本篇。又爲之圖。以備朝廷之覽觀焉。

建康根本論

臣聞帝王之開國啓土。必觀天之道。因地之利。審人之情。於以經理四方。而垂裕萬世。豈徒然哉。國家決策。南幸采羣臣之議。以建康爲京都。凡天之眷祐。地之便利。人之攸賴。盡在是矣。昔秦始皇東巡。經秣陵縣。望氣者云。金陵地形。有王者都邑之氣。張紘亦說孫權。地有王氣。天之所命。宜爲都邑。因徙治石頭。改秣陵爲建鄴。西晉之末。始改石頭爲建康。起元帝迄陳。區區強霸。曾不足以當此休應往者。主上駐驛金陵。天人之際。於斯和會。是知符命所從來遠矣。其開基傳祚。豈有窮哉。前所謂觀天之道者。此也。建康在

東南爲一都會。控帶荆揚。引輸江湖。咫尺淮甸。應接梁宋。其山川之雄盛。原隰之平衍。食貨之富饒。真足以容萬乘而供六師。前所謂因地之利者。此也。且時巡南國。宜順人心。作京宅土。以塞吳中。父老望幸之意。矧北土之民。謫歌未改。一聞法駕臨江。有以知聖神不忘中原之志。延頸企足。孰不僂戴。前所謂審人之情者。此也。夫天之所助。地之所宜。人之所向。三者合而升平之期可必矣。若乘此機會。都於建康。則是興王之基已立。改令更化。練兵積粟。以須天時。神州赤縣。不難復也。大計一定。至於修城隍。作宮室。立宗廟社稷。增戍守。畫封圻。此有司之事。稽之於古。驗之於今。斟酌損益。條具於後。

歷代議遷都

吳孫皓遷都武昌。陸凱上疏曰。武昌土地實危險而墮埆。非王都安國養民之處。船泊則沈漂。陸居則峻危。且童謠言。寧飲建鄴水。不食武昌魚。寧還建鄴死。不止武昌居。童謠之言。生於天心。乃以安居比死。足明天意。知民所苦也。

晉蘇峻、平宗廟宮室。竝爲煨燼。溫嶠議遷都豫章。三吳之豪。請都會稽。二論紛紜。未有所適。王導曰。建康古之金陵。舊爲帝里。又孫仲謀、劉先主俱言王者之宅。古之帝王。不以豐儉移都。若宏衛文大帛之冠。則無往不可。若不績其麻。則樂土爲墟矣。且北寇游魂。伺我之隙。一旦示弱。竄於蠻越。望實皆喪。懼非良計。繇是嶠等謀竝不行。

南齊蕭穎胄議遷都夏口。柳忱以巴峽未賓。不宜輕捨根本。動搖人心。不從。俄而巴東之兵至峽口。遷

都之議遂息論者以爲見機

梁侯景平梁元帝臨荆陝二十餘年情所安戀不欲歸建鄴故府臣僚皆楚人竝欲歸都江陵云建鄴雖是舊都凋荒已極兼與北虜止隔一江若有不虞悔無所及帝無去意周洪正諫曰士大夫言惟聖所居本無定處若黔首未見入建鄴城便謂猶列國諸王今日赴百姓心不可不歸建鄴

南唐嗣主用唐鎬計遷都豫章改號南都然洪州乃藩鎮之地反爲王都官舍營壘十不容其一二自公卿下至軍士皐隸皆旦夕思歸

右南朝建都之地不過吳下建鄴豫章江陵武昌數處其強弱利害前世所論是非甚易明也吳孫策、晉以會稽爲根本及大帝嗣立稍遷吳下京口其後嘗住公安又嘗都武昌蓋往來其間因時制宜不得不爾及江南已定遂還建鄴保有荆揚而與魏蜀抗衡其宏規遠略晉宋而下不能易也故孫皓舍建鄴而之武昌吳因以衰梁元帝舍建鄴而守江陵梁遂以亡李國主舍建鄴而遷洪府南唐終不能以立善哉王導之斷也析會稽豫章二論而綏輯舊都轉危爲安運亡爲存晉以永世導之力也夫古者建都啓土必謀之卜筮今都邑之議時有不同胡不觀之歷代之得失其爲卜筮亦大矣

修城隍 歷代城隍

都城

輿地志建鄴都城周二十里十九步本吳舊址吳都城賦云鄂郭周而不重城結隅通門二八水道陸衢

所以經始用累千祀。吳之城郭其可攷者大略如此。

建康實錄。晉始繕苑城修六門。卽吳舊城也。江左所築但有宣陽門至成帝作新宮始修城開陵陽等五門與宣陽門爲六。又云雖經五代門牆互有修改其實都城皆吳之舊址也。

倉城

吳大帝三年使御史鄒儉監鑿城而南自秦淮北抵倉城名運瀆按建康實錄宮城卽吳苑城城內有倉名曰苑倉故開此瀆通運於倉所時人亦呼爲倉城咸和中修苑城爲宮惟倉不毀故名太倉在西華門內道北

臺城

晉武帝七年作新宮輿地圖云卽臺城也在縣東北五里周八里

東府城

輿地志在縣東七里清溪橋臨淮水周三里九十步本琅邪舊第後爲會稽王道子領揚州刺史以爲治所時人呼爲東府宋武帝領揚州因築城以居彭城王義康更開拓北墉峻西塹自後常爲宰相廨也齊高帝封齊王以東府爲齊宮城

西州城

卽古揚州城在上元縣之西二里周迴三里輿地志云揚州廨王敦所創也石氏之亂焚燒府舍陳敏

營孫氏故宮居之。元帝初渡江，卽東府創今城。其後會稽王道子領揚州，而居東府，故號此爲西州。大明中以東府爲諸王邸，西州爲丹陽。

石頭城

吳志十六年，孫權徙治建鄴。明年，城石頭，改秣陵爲建鄴。蘇峻據石頭城，王師旣集，峻攻大業壘，陶侃將救之，周羨曰：「若救大業，步兵不如峻，但當急攻石頭，峻必救之，大業自解。」侃從之，峻果棄大業而救石頭。

王敦舉兵，明帝以溫嶠守石頭，孫恩寇京口，元顯守石頭，桓溫西征，朝廷空虛，以劉波頭領五千人鎮石頭。

自宋以後，江邊有警，必先據石頭以爲扞禦。石頭圖經云：在今上元縣西五里，緣江圖云：石頭城南抵淮水，當淮之口，南開二門，東一門，吳大帝築以貯寶貨軍器，有戍軍，晉室中興，常爲險要，必守之地。義熙中再修治，自宋齊以來，多以諸王鎮之。陳大建中又加修築，以貯軍食。

越城

王含、錢鳳等至于南岸，夜遣段秀屯水北平旦戰於越城，大破之。盧循至淮口，令王仲德屯越城。

崔慧景寇建鄴，蕭懿入援，自采石濟岸，頓越城，舉火臺中鼓譟稱慶。

圖經越王城在江寧縣南三里越絕書云范蠡築周迴二里八十步又曹憲揚州記云越王所築背句踐平吳之後伐楚乃築此城在秣陵長千里

右建康故城在上元縣東三國志孫權徙治建鄴明年城石頭改秣陵爲建鄴興地志云都城周二十里一十九步本吳舊址蓋孫權雖城石頭以扼江陰然其都邑則在建鄴故城歷代所謂都城者是也東晉及宋齊梁陳因之雖時有改築而其經畫皆吳之舊也諸葛亮論秣陵地形云鍾阜龍蟠石城虎踞則南朝都邑襟抱左右概可見矣晉宋以來而淮有朱雀航宋文帝作元武湖蓋傅會龍蟠虎踞而爲此名也有曰臺城則宮省之所寓也有曰東府西州城則諸王若宰相居之有曰倉城則儲蓄之所在也以宮室記攷之皆在都城之內然舊城在北去秦淮五里故淮上皆列浮航緩急則徹航爲之備吳緣淮立柵前史所謂柵唐是也其江岸必爭之地則別築石頭城常以腹心大臣鎮守其處及楊行密徒築今城則稍遷近南夾淮帶江以盡地利然城之西隅據石頭岡阜之脊以立城基又城之南與天禧寺相直卽昔人所謂大長干是也其城基與長干山勢連接形勢如此所謂與敵分險者也昔王僧辯屯石頭城侯安都令軍人奉之投於女牆內衆隨而入國初曹彬之下自京口襲之以石頭城北接岡阜不甚險峻故安都江夏登長干北望金陵問其地曰伏龜於是督軍攻之南城遂陷然則今之下瞰城內宜占形勝修築堡塲令可容三五千人以備非常如披城下寨之類是也

溝池、秦淮。

孫盛晉陽秋云淮水秦所開故謂之秦淮建康寶錄秦淮舊名龍藏浦其上有二源一發自華山經句容縣南流一發自東廬山經溧水北流入江寧界二源合于方山西注大江分派曲折不類人功疑非始皇所開張紘云始皇東巡望氣者云金陵地有王者都邑之氣故掘斷連岡接石頭城處今方山石澆橫瀆是也南朝時淮水流經建康秣陵二縣之間至於石頭入江吳時夾淮立柵十餘里梁天監中作兩重柵皆施行馬又淮上自石頭至運鱈總二十四渡皆浮航往來惟大航用杜預河橋之法本吳時南淮大橋也一名朱雀橋橋當朱雀門下度淮水王敦作逆溫嶠燒絕之是後以舶船爲浮橋復有驃騎航行格航丹陽城後航總四航遇警急卽撤航以爲備今秦淮二源如古歷上元江寧縣界自建康城東北入城中西入大江

潮溝、運瀆、清溪。

吳志令侍御史鄒儉作運瀆地志云潮溝吳大帝所作以引江潮在六門之西及今九州廟西瀆是也建康錄吳赤烏四年詔鑿東渠名青溪通城北塹潮溝以地志攷之古城西南行者是運瀆自歸善寺門前東出青溪者名潮溝其實青溪引秦淮水運瀆引江水皆灌注古城中曲折縈帶皆通城北塹轉入後湖今運瀆已湮塞潮溝在上元縣西四里闊三丈深一丈今青溪在縣東六里闊五丈深八尺歲

久淺涸水流斷絕不復通城北塹也。

右古城近北秦淮既遠其漕運必資舟楫而濠塹亦須水灌注故孫權時引秦淮爲運瀆以入倉城開潮溝以引江水又開瀆以引後湖又鑿東渠名青溪皆入城中繇城北塹而入後湖此其大略也自楊行密依淮爲城其城之東塹皆通淮水其西南邊江以爲險然春夏積雨淮水泛溢城市皆被其害及盛冬水涸河內往往乾淺議者以謂合於秦淮上下置閘遇淮水暴漲卽閉上流令水自城外輸瀆入濠以殺水勢如冬淺涸卽閉下流蓄水以養壕塹又城北面地勢大段高峻其壕水不過數尺若據吳之舊開潮溝以東引江水開青溪以西引秦淮繁繞城之北面入於後湖則城北壕塹自然通快矣

戍守歷代戍守

白下上元縣西北一十四里與地志齊武帝以其城依山帶江移琅邪郡居之

陳武帝與齊兵戰於幕府山命侯安都自白下橫擊其屯大敗之

蔣元遜領青龍八十艘於白下遊奕以禦隋六合之兵上元縣北十五里

蔣山

宋武帝之入討隋師伐陳蘇峻內向皆先據蔣山賀若弼至建鄼司馬涓進言於後主請北據蔣山南

斷淮水

龍尾蔣山青龍山之閒

齊兵北渡蔣山。侯安都與齊將戰于龍尾。

覆舟山。

蘇峻濟自橫江至陵口，遂據蔣山之覆舟山下，範之屯覆舟山西。宋武帝艦軍於覆舟東，張疑兵油幘冠諸木，徧滿山谷。帝先馳之，將士殊死戰，大敗楚兵。

北郊壇上元縣覆舟山
之南去縣十里

王師之禦王恭謝炎守北郊。

盧循入寇，劉欽宣守北郊。

齊寇至幕府山，陳高祖移頓郊壇北。

藥園在北郊
壇之西

宋武帝築藥園壘以拒盧循。

幕府山上元縣西
二十五里

徐嗣徵引齊兵營幕府山。

齊兵至幕府山南，陳武帝自覆舟東移，斷郊壇北與齊人對壘。

西陵上元縣東北一
十五里，吳大帝陵也。

蘇峻至蔣山，大壘戰于西陵，敗績。

白土岡。上元縣二十二里，周退一里高十二丈，南至淮。

賀若弼進軍鍾山。魯廣達於白土岡與若弼旗鼓相對。隋軍退走。

土山。上元縣東南三十里，周退四里高二十丈。

石季龍將寇海道。蔡謨所統七千人東至土山西至江乘鎮守八所城壘凡十一處。

宋武帝進至羅落橋斬皇甫敷。

江乘。漢武帝時江乘縣屬丹陽郡。吳錄、江乘屬建鄯太康地志亦屬建鄯。東晉以江乘屬南琅邪郡。南徐記江乘縣西有江乘今在上元縣西北一十七里。

孫策渡江轉攻江乘。

徐盛作疑城自石頭城至江乘。

蔡謨鎮守八所自土山至江乘。

竹里。在句容縣方輿記行者以其輕險號翻車規。

宋武帝舉兵至竹里。

直瀆。上元縣西北三十五里。

直瀆山。上元縣北四十里。

蘇峻犯建鄯王佺期鄧嶽次直瀆

四望磯。上元縣西北八里西臨大江南連石頭城。

溫嶠討蘇峻於四望山築壘以逼石頭。

新洲。上元縣北五十里。

宋武帝伐荻新洲。

孫恩至新洲不敢進。

白石。上元縣北一十二里南徐記檣湖西北有蘇峻湖本名白石陂古白石壘也。

陶侃討蘇峻諸將議於查浦築壘部將李根建議請立白石壘曰查浦地下又南唯白石峻極險固可容數千人賊來攻不便滅賊之術也侃從根謀夜修曉訖賊見壘大驚。

以上係上元縣界。

查浦。江寧縣西南二里建康寶錢石頭南上一十里。

陶侃屯查浦。

李陽與蘇逸戰于查浦。

盧循犯建鄴宋武帝柵石頭斷查浦以拒之。

新亭。圓經新亭鄉在江寧縣東南四十里吳錢南上十里。

楊佺期至石頭聞劉牢之領北府兵在新亭賊皆失色乃回歸師屯于蔡洲。

李居士屯新亭。曹景宗、馳戰敗之。

崔慧景、兵至新亭石頭、白下、兵皆潰。

徐道覆、勑廬循焚舟、自新亭步上。

新林三十里。
江甯縣南

侯景圍臺城。柳仲禮、韋粲、合軍屯新林。

板橋。
江甯縣南

晉師將至、吳遣張悌、屯板橋。

梁武帝起兵、令將軍呂僧珍、屯白板橋。

江寧。
縣西南六十里

王敦、蘇峻犯建鄴。晉武帝、梁武帝、起兵、皆屯江寧。

慈湖。
太平州界至建康七十五里

石季龍寇歷陽。趙嗣屯慈湖。

蘇峻敗司馬流於慈湖。

牛渚。
太平州界至建康八十五里

吳孫瑜、自溧陽移兵屯牛渚。

東南防守利便
上

孫直督牛渚作橫江塢。

晉王渾周浚濟自牛渚破吳師於板橋。

蘇峻自橫江登牛渚至蔣山。

采石。

侯景陷歷陽。武帝問羊侃討景之策。侃求以二千人急據采石。令邵陵王襲取壽春。使景進不得前。退失巢窟。烏合之衆。自然瓦解。議者謂景未敢便逼都。遂寢其策。令王質往。侃曰。今茲必敗矣。

隋軍濟江。陳樊毅謂袁憲曰。京口采石俱是要所。各須銳卒數千。巡於江中。上下防扞。如其不然。大事去矣。

張公洲。縣西南五里。周迴三里。

梁書。太清二年。豫州刺史裴東之舟師次張公洲。

陳霸先擊破侯鑑于張公洲。

蔡洲。江寧縣西新一十二里。周迴五十五里。

陶侃溫嶽討蘇峻。直指石頭。次于蔡洲。

盧循大至。宋武帝曰。若新亭直上。且將避之。若回泊蔡洲。成擒耳。

荀子洲。江寧縣西十三里。周迴四十一里。

溫嶠、陶侃、赴援、侃泊茄子洲。

郗鑑自廣陵來、會于茄子洲。

倪塘江寧縣東南五十里

王含、錢鳳、逼建鄴、帝夜募士渡水、掩其不備、大破含軍、含率餘黨、於倪塘西置五城、如劄月勢。

三山江寧縣西南五十七里、輿地志云、吳舊津所也

王濬伐吳、順流鼓棹、直指三山。

冽山江寧縣西南七十里、輿地志、吳舊津所也、內有小河可泊船、商客多停此、以避熱風故以名焉、伏滔北征記亦謂之溧洲、洲上有小山、其形似栗、因名之

宋武帝義師討逆、劉牢之爲前鋒、率北府文武、屯冽洲。

以上係江甯縣界

江寧鎮江寧縣西南六十里、事具在前

江寧鎮、當太平人建康水陸之衝、今但有鎮將、去大城岡、馬家渡、巡檢寨、尚遠、謂宜措置、比之秣陵、淳化、龍安、事體最重。

秣陵鎮

昔孫策渡江攻牛渚、遂至秣陵、時薛禮據秣陵、笮融屯縣南、策以融險固去、轉攻湖熟、江乘、徐嗣徵引齊兵以攻秣陵故城、跨淮立橋柵、度兵爲、自方山進及倪塘、吳孫皓時、施坦、衆萬餘人、自秣陵將逼

建鄴諸葛靚迎擊坦於九里汀今秣陵之南也繇此知秣陵北抵句容南抵建康屯兵設備不可不密淳化鎮

淳化鎮所以蔽遮句容縣而應接京口其名雖不見於載籍而在今之形勢實爲衝要

龍安鎮

龍安之名不載於晉宋以來諸書然與其州宣化鎮分江爲界自宣化鎮至盤城竹墩上下瓦梁乃泗淵之間道其斥堠戍守不可不嚴

下蜀鎮巡檢寨句容縣至府一百五里東陽巡檢寨句容縣至府六十里石步巡檢寨上元縣界至府四十里靖安巡檢寨上元縣界至府一十五里

卽舊龍安鎮自宣和中方改曰靖安置大城岡巡檢寨江寧縣界至府四十里

沿江巡檢皆是江流險要之地其土軍不過百十人所管舟三五隻謂宜量地之宜修築城堡令可容三二十人平居無事止令巡檢土軍守禦遇有警急須增馬兵爲備其舟船亦合計置增添古人論守江之策不過岸上築塢水中浮船此今之先務也

右建康四境東鎮江府北真州六合縣西和州西南太平州皆沿江要害之地也自南朝以來敵國若寇盜出廣陵六合蘇京口以逼建鄴則所備者自下蔣山龍尾覆舟山白土岡北郊壇藥園幕府山羅落橋江乘竹里今上元縣句容縣之境也若自上流或渡歷陽而來則所備者石頭查浦新亭板橋江寧慈湖牛渚采石今江寧縣太平州之境也若舟師浮江而下則所備者直瀆新洲四望磯白石張公

洲、蔡洲、茄子洲、倪塘、三山、冽洲、今上元縣、江寧縣、之境也。按今之州縣四境，參考之諸書，凡兵所從入與建鄴扞禦之地，則異時軍行頓宿與城守屯防，可得而言矣。且晉之伐吳也，王渾、周浚自牛渚至板橋，斬吳軍師張悌、王濬以舟師，自三山至于石頭城，則是兩軍水陸並進，皆趨建康之南而也。宋武帝之討逆也，起兵於京口，次於竹里，斬吳甫之於江乘，進至羅落橋，斬皇甫敷，遂至覆舟山，則是義師自南徐之東北，歷句容縣，出於蔣山，以攻建康之北面也。隋之伐陳也，賀若弼自廣陵濟江，攻下京口沿江諸戍，分兵斷曲河之衝而入，韓擒虎濟自橫江，分兵晨襲采石，取之，進拔姑熟，次于新林，二將會兵，南北道並進，若弼敗陳師於白土岡之東南，遂薄都城。韓擒虎自新林至于石子岡，繇朱雀航入南掖門，則是一軍攻建康之東，引兵以據蔣山之南，一軍攻建康之南，乘勝以趨秦淮之北也。蘇峻自歷陽舉兵，令韓曉入姑熟，屠于湖，戰于慈湖，峻濟自橫江登牛渚，至蔣山，戰于西陵，遂破青溪柵，則是峻令別將攻慈湖，以牽制江寧以南，而後取牛渚，閒追出蔣山北，以瞰都城也。推此，則前世敵之所必攻，與我之所必守，其險易遠近，可坐而得矣。爲今之成備，其不可密乎？然有所謂因敵之變，以爲緩急，寇來則據險，寇去則解嚴，是也。有所謂隨地之形，以爲輕重，治軍旅於閒暇之時，修壁壘爲長久之計，是也。何謂因敵之變？以爲緩急。昔石季龍於青州造船數百，掠沿海諸縣，朝廷以爲憂，蔡謨遣徐元等守中洲，并設募取季龍舟船，是時謨所統七千人，所戍東至土山西至江乘，鎮守八所，城壘凡二十處，烽火接望三十餘處，蓋季龍謀出海道，則備建康京口之東北，如土山、江乘，此其津要也。咸康中，石季龍寇

歷陽王導都督諸軍事以禦之。令趙嗣屯慈湖路永戍牛渚，却鑑使陳光率衆以衛京師。蓋季龍將橫涉江，則備建康之南。如慈湖、牛渚，此其噤喉也。盧循至淮口，琅邪王次中堂。宋武帝次石頭，王珍屯南掖門。劉欽宣屯北郊，築查浦、藥園、建尉三壘以拒之。蓋盧循已逼秦淮，則備建康之西南。且備建康之北，如石頭、南掖門、北郊，以據其便利。如查浦、藥園、建尉，以遏其奔衝者也。何謂隨地之形，以爲輕重？自吳以來，石頭南上至查浦，查浦南上至新亭，新亭南上至新林，新林南上至板橋，板橋南上至冽洲，陸有城堠，水有舟楫。今欲備建康之南，其措置之策，莫先於此也。韓曉築石頭五城，修塉壁，起建鄴，抵京覲樓，規相望，置館第數十餘石頭城，穿井皆百尺，造樓船皆三千柁。繇海門大閔，至申浦而還。今備建康之北，其施設之方，莫先於此也。雖然，事有便於古，而亦可施於今，則如前所陳是矣。事有宜於今，而不必出於古，請得而論之。今建康四面，如江寧、秣陵、淳化、龍安諸鎮，如下蜀、東陽、石靖安、天城岡、馬家渡、網沙夾、慈湖諸巡檢，其名不皆見於地志，而其事不盡傳於舊史。然觀其形勝，詢之父老，其利害較然可曉。議者謂諸鎮寨宜作城塹，具艍艦，增卒戍，稽之於古，驗之於今，可依擬斟酌而行也。雖然，以道爲形勢者，守四夷以人爲形勢者，守四藩以地爲形勢者，守四境。苟經略無以治外，則雖有金城湯池，不足以爲險也。苟政事無以得民，則雖有壯堠巨屏，不足以爲強也。孟子曰：地利不如人和。吳起亦云：百姓安其田里，親其有司，則守已固矣。第著之末篇，以待朝廷之選擇云。

漢丹陽郡領宛陵、於潛、江乘、春穀、秣陵、故鄣、句容、涇、丹陽、石城、姑熟、陵陽、蕪湖、宣城、丹陽、永平、臨城、懷安、寧國、安吳、廣德。晉太康中改永平曰永世分秣陵置建康割宣城、宛陵、陵陽、涇、安吳、廣德、寧國、春穀、

石城、臨城、懷安、十一縣屬宣城郡而更置于湖、江寧二縣安吳、廣德。

唐初改金陵爲白下延陵、句容二縣屬潤州丹陽、溧水、溧陽三縣屬宣州。

今建康四至八到。

東至潤州一百八十里 西至和州烏江縣五十五里 南至宣州寧國縣九十九里 北至真州六合縣九十九里

東南到湖州安吉縣常州宜興縣兩縣爲界三百三里 西南到太平州一百里 東北到潤州一百九十九里 西北到真州宣化鎮四十里

領縣五

上元 江寧 句容 漢水 漢陽

東西二百三十五里 南北四百六十里

右漢元封時丹陽領縣十七及孫氏有國建鄴領縣十九晉太康中割縣十一入宣城郡唐初以東境屬潤州南境屬宣州蓋其江山形勝當天下多事則爲帝王所都及夫削平之後必稍割邊縣以分其勢其措置不得不然也今建康提封不能數百里今京邑浩穰之置謂宜合并京口姑熟以爲王畿升

宣城、池陽、比之輔郡。且京口在南朝號稱三鎮。庱亭、大業、曲河、長岡爲國東門之限。姑熟與建寧、亭驛相望。戍蕪湖、備牛渚，其事見於載籍者不一。宣城據池陽徽之孔道。池陽控帶上流。晝夜分疆。以屏王室。擇守將屯重兵。略如晉宋之舊。比漢丹陽、吳建鄴之邦。未爲過也。

歷代宮室

太康三年地志。吳太初宮三百丈。權所起也。昭明宮方五百丈。皓所起也。在縣東北三里。晉建康宮城之西南。

晉元帝渡江鎮建鄴。因吳舊都城修而居之。以太初宮爲府舍。石冰之亂。太初宮災燒殆盡。陳敏平石冰。因太初故基創造府舍。元帝所居卽敏所作府舍。帝領江左積十一年。始卽帝位。常居舊府。明帝亦不改作。至成帝始繕苑城。地志云周八里。

武帝三年春二月。作新宮。尚書僕射謝安。決意修定。皆仰模元象體合辰極。二月始工。內外日役六千人。秋七月。新宮成。內外殿大小三千五百間。今宮城周迴四里四十五步。上闕二丈。下闕二丈四尺。高二丈。僞吳順義中築行宮在子城西偏。

右吳太初宮方三百丈。晉建康宮周八里。今宮城之廣狹。方晉則不足。比吳則有餘。其地北枕覆舟山。蓋鍾山之麓也。牛首在其前。卽王導所謂天闕者是矣。左鍾阜右石頭龍蟠虎踞。真帝王之宅也。故自來守臣以前朝故宮不敢正據。而勢其府舍廳事在子城之西偏。比年修行宮。又失於考訂。改作豈至

尊當易之義耶。昔汴京修大內既成，太祖居正殿，洞開朱朱門，直望之，謂左右曰：此如我心小有偏曲，人皆見之，謂宜卽子城之中爲正殿，與金闕門相直，稽之五行家，旣云便利，又合於制度，昭然可信，不疑也。昔吳大帝欲徙武昌材瓦，更繕治太初宮，羣臣奏言：武昌宮已二十八歲，恐不堪用，宜下所在，通更代致。帝曰：大禹以卑宮室爲美，今軍事未已，所在多賦，若更通代致，妨損農桑，徒武昌材瓦，自可用也。及晉謝安啓作新宮，王彪之曰：中興卽位，東府殊爲儉陋，元明之朝，亦不改制，燕峻之亂，成帝止閑臺都坐，殆不蔽寒暑，是以更營修築，方之漢魏，誠爲儉狹，復不至陋，殆合奢儉之中，今自可隨宜增修，強寇未殄，不可大興功力。安曰：宮室不壯，後世謂人無能。彪之曰：任天下事，當保國寧家，朝政惟先，豈以修屋舍爲能邪？觀大帝詔與彪之之論，他日營繕，可爲法也。

歷代二郊宗廟社稷

南北郊

建康實錄、元帝二年作南郊，在宮城南十五里，郭璞卜立之，案輿地圖，在今縣城南十八里，長樂橋東離外三里。

建康圖經、古南郊壇，在縣南十八里。
成帝八年作北郊壇，於覆舟山之陽，制度一如南郊。建康實錄云：北郊壇在縣東八里，潮溝後東近清溪，今蔣山南有北郊壇，卽陳武帝破齊師處。

晉書。元帝渡江。太興二年。始議立郊祀儀。尚書令刁協、國子祭酒杜夷、議宜須旋都洛邑。乃修之。司徒荀組據漢獻帝都許。卽便立郊。自宜於此修奉。驃騎王導、僕射荀崧、太常華常、中書侍郎庾亮。皆同組議。事遂施行。立南郊於其地。其制度皆太常賀循所定。多依漢及晉初之儀。是時尚未立北壇。地祇衆神尙依天郊。成帝咸和八年正月。追述明帝前旨。於覆舟山南立之。天郊則五帝之佐。日月五星。二十八宿。文昌、北斗、三台司命。后土、太乙、天乙、太微、勾陳、北極、雨師、雷電、司空、風伯老人。六十二神也。地郊則五嶽四望、四海四瀆、五湖、五帝之佐。沂山、嶽山、白山、霍山、醫巫閭山、蔣山、松江會稽山、錢塘江、先農、四十四神也。江南諸小山。蓋江左所立。猶如漢西京、關中小水。皆有祭秩也。是月辛祀北郊。始以穆宣張皇后配地。魏氏故事。非晉舊也。

宗廟社稷

晉初置宗廟。在右都城宣陽門外。郭璞卜遷之。左宗廟。右社稷。輿地志云。今縣東二里。亢風觀。卽太社西偏。對太社右陞。東卽太廟地。社立三壇。帝社、太社各一稷。一晉武帝十六年。改築太廟。輿地志云。太廟中宗置。及武帝卽位。常嫌廟東逼水。西逼路。因改築。欲因洛陽故事。遷入宣陽門內。僕射王恂奏。以為龜筮弗違。帝從之。開埤牌東西四十丈。南北九十丈。五代仍之。至陳乃廢。晉初仍漢魏舊儀。但置官社而無官稷。但太社有稷。而官社無稷。故常二社一稷也。太康中詔併二社之祀。傅咸奏。宜如舊詔。一依魏制。至元帝建武元年。又依洛京二社一稷。建康圖經。古太社太稷壇。在縣東二里。

右吳大帝時，羣臣上奏，宜修郊祀以承天意。帝曰：「郊祀當於土中，今非其所，於何施此？」重奏曰：「普天之下，莫非王土。王者以天下爲家，昔周文武都於豐鎬，非必土中。」帝不聽。終吳之世，郊祀廟社缺然無可紀者。晉之東遷，萬事草創，而其禮文亦時有可觀。二郊宗廟社稷，故處今尚可攷。南朝四代，莫之改也。如荀組援都許立郊之議例，與吳之諸臣其意正同。記云：「將營宮室，宗廟爲先。」詩人歌太王遷岐之事，曰：「乃立冢土，戎醜攸行。」然則王者定都開基，必徵神於三神，爲法於後世。郊祀廟社，其可緩乎？前日駐驛維揚，及幸會稽、臨安，將草其儀，而未暇遑也。萬一再臨江左，建城市，營宮室，願戒有司，議先二郊宗廟所在，以稱明主若奉天事神、念祖修德之意。

東南防守利便中

江淮表裏論

江淮之險，天地之所以限南北也。自昔立國於南，則守江以爲家戶，備淮以爲藩籬。當三國時，吳割據荆揚，盡長江所極而有之。而壽陽、合肥、斬春皆爲魏境。吳不敢涉淮以取魏，魏亦不敢絕江以取吳。蓋其輕重強弱足以相攻拒也。故魏人攻濡須，吳必傾國以爭之。吳人攻合肥，魏必力戰以拒之。終吳之世，曾不得淮南尺寸之地。江邊單外，故卒無以抗魏。魏已下蜀，經略上流，屯壽春，出廣陵。此吳之所以爲禽也。東晉迄陳、彭城、盱眙、江都、廬、壽諸鎮之地，皆入南。常据江扼淮，以防北敵。至陳宣帝，而淮南之地盡歸于周。未幾而陳亡，從而觀之，形不合，則東南之守必孤。真表裏之勢，則然也。今自淮而東，以楚泗、廣陵爲之表，則京口、秣陵得以蔽遮。自淮而西，以壽、廬、歷陽爲之表，則建康、姑熟得以襟帶。江西之鎮，莫重於潯陽。而舒蘄者，實尋陽之表也。湖北之鎮，莫繫於武昌。而齊安者，實武昌之表也。表裏江淮，包括東南，其來尚矣。凡我之所以守，若敵之所以攻，古今之宜，蓋不甚相遠。昔魏文帝嘗以舟師自譙循渴入淮，從陸道至徐，因幸廣陵，臨江而觀兵矣。吳之所備者，不過自石頭至江乘，浮船列戍以應之而已。苻堅嘗出汝穎，破壽春，以撓晉。晉之所備者，不過以宰相爲征討大都督，屯江之南，遣謝元衆軍擊洛濶，渡淝水以應之而已。凡魏太武嘗濟淮，飲江營瓜步山以窺宋矣。宋之所備者，不過沿江六七里，百數艙艦相接以應之而已。凡

此因淮甸之勢以保江南之策也。觀之前世知敵之所繇入則吾之所以爲守者可不固邪。魏之屯用皖城謀以弱吳孫權乘雨水入皖督軍攻城須臾遂拔自是皖城屬吳矣。魏以晉宗爲斬春太守數寇吳境。吳遣賀齊襲斬春生致晉宗今皖與斬江州之北境也。曹操治水軍順流而下周瑜程普督軍以逆之遇於赤壁初一交戰操兵敗退瑜屯南岸使黃蓋焚北船操因遁去今赤壁武昌之北境也。凡此舉江南之衆以入淮甸之策也。觀之前世知我之所以取則知敵之所以攻可不備邪。噫欲守江爲家戶然淮甸之勢未立則江豈可得而守之也。又欲備淮以爲藩籬然江南之基未固則淮豈可得而備邪。守江以治內備淮以治外此兩者可以並行而不可以偏廢何哉。異時金人出沔鄂剽豫章而全軍直指金陵比僞齊之兵頓譙尾以禁壽春而李成睢盱於漢上夫敵人之情蓋可見矣而吾之所以自治者自江而南教化政刑方圖之而未暇舉淮而外郡縣鄣塞皆置之而不問此何理也。議者以謂宜修政事治軍旅以保江南任將帥積芻粟以保淮甸表淮而裏江形勝已全則我之所以備敵者敵還以備我敵之所以攻我者我還以攻敵起荆襄而至于江左政舉而人和兵強而食足則進之東西倚江以爲重恃江以爲援敵人知之彼且設備於宿毫必不能默集青徐以擾關輔矣。彼且設備於光順必不能轉輸陳許以給大梁矣如是則我之所以備敵者專而敵之所以備我者分則是我衆而敵寡矣。占天之時因人之心張皇六師指揮四方一軍自淮泗以擣青徐一軍自壽春以收汝潁彼敵之赴救遠近不相及也求財於蜀合軍於陝以遏河隴出師襄漢因糧唐鄧以趨京洛彼敵之與國番漢不相親也如是則我之攻敵者有餘而敵

之應我者不足，則是我爲之主，而敵爲之客也。蓋嘗論之，江淮之虛實，南北之雌雄，我不能覽而用之，則權歸於敵；敵不能攘而有之，則權歸於我。權之所在，成敗之機，隆替之原也。譬之弈焉，或營其邊，或營其腹，邊腹之間，布置定矣。及其取勝，必先人者也。然則江淮之表裏，其事詎可緩邪？謹條具如右。

盱眙

符堅將彭超攻彭城，謝元率何謙、高衡、次于泗口，堅將俱難、毛當、來會超，有衆六萬，詔征虜將軍謝石率水軍次涂中，右衛將軍毛安之游擊將軍河閒王曇之、淮南太守楊廣、宣城內史邱準次堂邑。旣而盱眙城陷，高密內史毛藻戰沒。安之等軍人相驚，遂各散退。朝廷震動，元於是自廣陵西討難，等何謙解田洛圍，進據白馬，與賊戰，大破之，斬其將都顏，因復進擊，又破之，斬其將邵保。超難引退。

魏太武率大衆數十萬向彭城，宋遣輔國將軍臧質北救，始至盱眙，太武已過淮。及太武自廣陵北返，悉力攻盱眙，就質求酒，質封溲便與之。太武怒甚，築長圍，一夜便合。質報太武書，引童謠言：虜馬飲江水，佛狸死卯年。太武大怒，乃作鐵牀，上施鎌，破城得質，當坐其上。質又與魏軍書，寫臺格，募斬太武，封萬戶侯，賜布絹各萬匹。魏以鉤車鉤城樓，城內繫繩數百人呼引之，車不能退，質夜以木桶盛人，縋出城，藏鉤獵之，明日以衝車攻城，城土堅密，落不下，不過數斗。魏軍登城，墜而復升，莫有退者，殺傷萬計。死者與城平，如此三旬，死者過半。太武乃解圍而歸。

泗口

石勒侵逼淮泗。帝求式遏邊境者。公卿舉卞敦鎮泗口。及勒寇彭城。敦退保盱眙。賊勢遂張。晉以王敦威強太盛。乃以劉隗鎮泗口。

今泗州

東本府界七十里。自界首至楚州一百三十里。

西本州界一百二十里。自界首至濠州五十五里。

南本州界一百里。自界至揚州一百七十里。

北本州界一百八十里。自界至淮揚軍一百二十里。

東南本州界八十五里。自界至揚州一百八十二里。

西南本州界六十五里。自界至滁州一百四十里。

東北本州界五十五里。自界首至楚州一百六十五里。

西北本州界一百九十里。自界首至宿州一百二十里。

右今泗州夾河爲城。而古盱眙在淮北岸。或請宜徙州治於盱眙。是不必然。今城鎮汴泗之衝。舟車之會。必守之地也。卞敦捨泗口退盱眙。而北寇之勢遂張。則今城不必廢。明矣。盱眙負山瞰淮。誠能治兵積穀。與民共守。分成泗口之城。兼淮汴之險。而有之。豈不壯哉。夫臧質以城而扞太武數十萬之衆。移書侮敵。使溫而致戰。驅士卒以鎧附之衆。不能損城之累塊。若臧質可謂善守矣。西北金湯之固。何過

不若盱眙而虜賊之多未必勝於太武。輶輶所向，曾無一人敢負盾而立者。賊雅步而登埤，吏民束手而就死，一何愚也。論者遂以謂金人之鋒不可當，而築壘鑿池，以爲無補。嗚呼，固堅壁之將，未有臧質於豈城之罪邪。

楚州

符堅遣俱難毛當等步騎七萬寇淮陰。盱眙彭超寇彭城。常鍾寇魏興。俱難陷淮陰。與超會師而南。王顯自襄陽而下。東會攻淮南。彭超陷盱眙。遂攻田洛于三阿。去廣陵百里。京師大震。臨江列戍。孝武帝遣謝石、次于余中、毛安之、王曇之、次于堂邑。謝元自廣陵以救三阿。次于白馬塘。俱難遣將都顏逆戰于塘西。元敗之。斬顏。進兵至三阿。與難、超戰。超等又敗。退保盱眙。難、超出戰。復敗。退屯淮陰。元遣何謙之率舟師乘湖而上。焚淮橋。又與難等合戰。斬其將邵保難等。遂退淮北。

符堅喪敗。謝安奏宜乘其釁。會令謝元北征。三魏皆降。元欲令豫州刺史朱序、梁國、往彭城。北固河上。西援洛陽。內藩朝議。以征役既久。宜置戍而還。使元還鎮淮陰。宋徐州刺史薛安都據彭城歸魏。遣從子索兒歸淮陰。蕭道成討破之。索兒走鍾離。道成追至黠戛而還。及張永等敗於彭城。淮南孤弱。以道成爲假寇軍將軍。持節都督北討前鋒諸軍事。鎮淮陰。初。周師南征。無水戰之具。已屢敗李景兵。獲水戰卒。乃造戰艦數百艘。使降卒教之水戰。命王環將以下淮。景之水軍多敗。長淮之舟皆爲周師所得。又造齊雲船數百艘。世宗至楚州北神堰。齊雲舟大不能過。乃開老鶴河以通之。遂至大江。景初自恃。

水戰以周師非敵且未能至江及陳覺奉使見周師列于江次甚盛以爲自天而下。

今楚州

東至海二百八十里。

西至本州界三十里自界至淮陽軍二百六十里。

南至本州界一百四十里自界首至揚州一百五十里。

北至本州界一百六十八里自界首至海州一百四十里。

東南至本州界一百九十里自界首至秦州一百九十里。

西南至本州界一百三十五里自界首至泗州四十五里。

東北至海一百六十五里。

西北至本州界一百六十里自界首至淮陽軍二百三十里。

右楚州控引淮海蕞爾盱眙廣陵之間彼兩郡特以爲形援而孤城當路非盱眙廣陵之爲唇齒亦無以自立往者承泰楚泗與揚有輔車之勢矣方金蹂踐苟合縱聯橫首尾相應淮南之地尙庶幾或存奈何諸鎮不知出此賊破廣陵遂圍山陽他將皆閉城自守以爲萬全矣及山陽敗沒承泰俄相繼而陷必然之理也今廣陵盱眙雖云謀帥而兵力寡小其視山陽不啻胡越不知山陽有一犬吠形之警則兩都獨能無事乎。

廣陵

黃初六年八月魏文帝以舟師自譙循渦入淮從陸道幸徐九月築東巡臺冬十月行幸廣陵故城臨江觀兵戎卒十餘萬旌旗數百里是歲大寒水道兵不得入江乃引還吳志云魏文帝出廣陵望大江曰彼有人焉未可圖也

後魏太武太平真君十一年十月車駕濟河乃命諸將分道並進車駕自中道十二月車駕至淮詔刈葭葦作筏數萬而濟淮南皆降車駕臨江起行宮於瓜步山諸軍同日皆臨江所過城邑莫不望塵奔潰其降附者不可勝數宋帝使獻百牢貢其方物有請進女於王孫以求和好帝以師昏非禮許和而不許婚明年正月大會羣臣於江上文武授爵者二百餘人車駕北旋

晉鄧鑑遷車騎大將軍督徐兗青三州軍事兗州刺史假節鎮廣陵及祖約蘇峻反聞難便欲率所領東赴詔以北寇不許於是遣司馬劉矩領三千人宿衛京都尋而王師敗績矩遂退還鑑奉詔流涕設壇場荆白馬大誓三軍登壇慷慨三軍悉爲用命率衆渡江與陶侃會于茄子浦還丹徒作壘以拒賊謝安上疏求自北征進都督揚荆司豫徐兗青冀幽并常益雍梁十五軍州事加黃鉞出鎮廣陵之步兵築壘曰新城命朱序進據洛陽謝元抗威彭沛

今廣陵

東至本州界八十里自界首至泰州一百八十里

西至本州界七十里。自界首至真州三十五里。

南至江四十五里。

北至本州界一百五十里。自界首至楚州一百四十里。

東南至本州界四十八里。自界首至潤州八里。

西南至本州界二十五里。自界首至真州三十五里。

東北至本州界八十里。自界首至泰州四十五里。

西北至本州界六十五里。自界首至泗州七十五里。

右西北以關塞爲險，東南以江湖爲險，故經營中原不都大梁，卽都關輔，若巡幸東南，其都邑之勝，惟建康而已。前日主議之臣，請駐驛廣陵，以爲北近大梁，可激中原人心邪，則建康猶廣陵也，以爲徘徊東南，待時而動邪，則廣陵非其所也。且自孫氏及晉宋以下，曹丕、魏佛狸、晉濟淮飲江，頓軍於廣陵矣，而石勒之兵亦嘗入寇去廣陵財百里，然則廣陵者，四戰之地也，奈何以萬乘之尊，居以九衝之衢，徹障塞，弛烽堠，晏然無備，而幸敵人之不來此，可乎不可也。夫廣陵非有河山之限，與壘壁之守也，必以盱眙爲之關鍵，以淮陰爲之藩籬，而又聚兵廣陵，輕重相制，遠近相及，而後淮東之勢成矣。今按撫使雖治廣陵，然軍旅寡缺，儲峙蕭條，平時喘噓，自救不暇，況能指揮支郡，號令諸將，以赴一朝之急耶。制置之間，不可不厚爲之備也。

壽春

母邱儉罪狀司馬景王移檄郡國舉兵迫脅淮南將守諸別屯者及吏民大小皆入壽春城敵血稱兵爲盟分老弱守城儉與文欽自將五六萬衆淮西至頃儉堅守欽在外爲游兵司馬景王統中外諸軍討之別使諸葛督誕豫州諸軍從安風津挺壽春征東將軍胡遵督齊徐諸軍出譙宋之間絕其歸路景王屯汝陽使監軍王基督前鋒諸軍頓據南以待之

符堅南侵遣征南將軍符融驛騎張蚝撫軍符方衛軍梁成平南慕容暉冠軍慕容垂率騎二十五萬爲前鋒融等攻陷壽春梁成與諸將率衆五萬屯于洛濶成頻敗晉師晉遣謝石謝元等水陸七萬相繼拒融堅捨大軍于項城以輕騎八千兼道赴之晉劉牢之率勁卒五千夜襲梁成壘剋之斬成及王顯、王詠等十將士卒死者萬五千謝石等繼進堅與符融登城而望王師見部陳齊整將士精銳又北望八公山上草木皆類人形顧謂融曰此亦勍敵也何謂少乎撫然有懼色謝石聞堅在壽春也謀不戰以疲之謝炎勸從朱序之言遣使請戰時張蚝敗謝石于肥南謝元勒卒數萬陣以待之蚝乃退別陣逼肥水王師不得渡元遣使謂融曰置陣逼水此持久之計豈欲戰者乎若小退師令將士周旋僕與君公緩轡而觀之不亦美乎融於是麾軍卻陣欲因其濟水而發之軍遂奔退制之不可止融騎馳掠陣馬倒被殺軍遂大敗王師乘勝追擊至于青岡死者相枕堅爲流矢所中單騎遁還於淮北齊高祖踐祚恐魏致討以爲軍衝必在壽春非墮崇祖莫可爲捍徙爲豫州刺史魏遣劉昶攻壽春崇

祖乃於城西北立堰。塞肥水堰。北起小城。使數千人守之。謂長史曰。若必悉力攻小城。若破此堰。於水一激急逾三峽。自然沈溺。所謂小勞而大制耶。及魏軍出西道。集堰南。分兵東路內薄攻小城。崇祖決小堰。水勢奔下。魏攻城之衆溺死千數。大衆退走。梁普通六年。大舉北侵。令夏侯亶。師譙州刺史范僧智等。攻壽陽。與魏將河間王琛。臨淮王彧等。相距。頻戰。剋捷。尋敕班師合肥。須堰成復進。七年夏。淮堰水盛。壽陽城將沒。亶帥湛僧智、魚宏、張澄等。通清流澗。將入淮淝。魏軍夾淝築城。出亶後。亶與僧智還襲破之。進攻黎漿。正威將軍韋放。自北道會焉。兩軍旣合。所向皆降。凡降城五十二。獲男女口七萬五千人。詔以壽陽依前代置豫州。合淝鎮改爲南豫州。以亶爲南豫州刺史。加都督。壽春久懼兵荒。百姓皆離散。亶輕刑薄賦。務農省役。頃之人戶克復。

晉溫嶠奏軍國要務。其一曰。祖約退舍壽陽。有將來之難。淮泗都督宜竭力以資之。選名重之士配征兵五千人。又擇一偏將將二千人。以益壽陽。可以保固徐豫。援助司土。

蔡戍

垣崇祖慮魏復攻淮北。啓徙下蔡戍於淮東。其冬。魏欲攻下蔡。及聞內徙。乃揚聲平徐故城。衆疑魏當於攻城土戍。崇祖曰。下蔡去鎮咫尺。魏豈敢置戍。實欲除此城。魏果夷掘下蔡城。崇祖大破之。

峽石按淮南有兩峽石。陸遜戰處在舒州桐城縣界。號南峽石。志。春坎石在壽春上蔡閒。蓋夾淮地名。今皆用壽春下。恐非是。

孫權使鄱陽太守周飭。諸大司馬曹休帥步騎十萬入皖。陸遜假黃鉞爲大都督。以逆休既覺知恥。見

欺誘。自恃兵馬精多。遂交戰。遜自中部。令朱穆、全琮爲左右翼。三道俱進。衝休伏兵。因驅走之。追亡逐北。徑至峽石。斬獲萬餘牛馬驢騾車乘萬輛。軍資器械略盡。

正陽

周拜李穀行營都部署。攻圍壽州。李景詔宋齊邱還金陵。以劉彥正爲神武統軍。劉仁瞻爲清淮軍節度使。以拒周師。李穀曰。吾無水戰之具。而使淮兵斷正陽浮橋。則腹背皆受敵。乃焚其芻糧。退屯正陽。南唐劉彥正帥師向壽春。以禦周師。李穀棄營退據浮橋。彥正議追之。劉仁瞻以謂不如養銳以俟其隙。彥正追之正陽。爭據其橋。爲周師所敗。

林仁肇密說李國主曰。請假臣兵數萬。直抵壽春。分據正陽。救復淮甸。臣請據淮而禦之。

今壽春府

東至本州界一百里。自界首至濠州二百八十里。
西至本州界五十五里。自界首至潁州一百九十里。
南至本州界五百二十里。自界首至舒州三百里。
北至本州界四十五里。自界首至亳州一百六十里。
東南至本州界一百二十里。自界首至廬州六十五里。
西南至本州界三百四十七里。自界首至光州二百二十里。

東北至本州界三十里。自界首至宿州一百五十五里。

西北至本州界一百十里。自界首至亳州二百一十里。

右壽春古南北之衝也。地入于南，則犄角謀譙宋，羈縻潁蔡。彼北方將應接之不暇矣。北人得之，則出合肥，擾廬陽、江表之民，亦豈得緩帶而寢耶？是以魏人與吳晉與符堅，宋齊與拓跋氏，南唐與周，常血戰而爭之，尺寸之地，不輕以爲敵也。今國家北境僅有淮濱而已，而壽春之阻，一爲王彥充襲奪，輒置而不問，何耶？不得壽春，淮西之安危，未可知也。或謂壽春故城，倚紫金山以爲固，當徙據其地，因修復忠正軍，以控扼淮上，如正陽、古下蔡戍，皆沿淮立柵，如峽石可築堡塲以爲防限。如是，則壽春之根勢立矣。鎮壽春與虛擣鼎峙，奄有淮西北向爭衡，豈惟保淮，是乃保江之策也。

合 肥

建安十三年，孫權爲劉備攻合肥。曹操自江陵征備，至巴邱，遣張憲救合肥。權聞憲至，乃走。

十四年春三月，曹公軍至譙，作輕舟治水軍。秋七月，自渦入淮出肥水軍合肥。

二十年，孫權圍合肥。張遼、李典擊破之。

二十一年，治兵，遂征孫權。十一月至譙。

二十二年春正月，軍居巢。二月，進軍屯江西郝溪。權築濡須拒守，遂逼攻之。權退走。三月，軍還，留夏侯惇、曹仁、張遼等屯居巢。

青龍二年五月孫權入居巢湖口向合肥新城又遣陸議、孫韶各將萬餘人入江將軍濡寵進軍拒之寵欲拔新城致賊壽春魏帝不聽曰先帝東置合肥南守襄陽西固祁山賊來輒破於三城之下地有所必爭也縱權攻新城必不能拔敕諸將堅守吾將自往征之比至恐權走也秋七月御龍舟東征權攻新城將軍張穎等拒守力戰魏帝未至數百里權遁走議韶亦退

諸葛恪圍新城朝議慮其分兵以寇淮泗欲戍諸水口晉帝曰恪新得政於吳欲徼一時之利并兵合肥以冀萬一不暇爲青徐患也且水口不一多戍則用兵衆少戍則不足以禦寇恪果併兵合肥毋邱儉文欽請戰晉帝命諸將高壘以擊之恪攻城力屈死傷大半乃敕欽督銳卒趨合榆邀其歸路儉率諸將以爲後繼恪懼而遁欽逆擊大破之

濡須附

孫權建安十六年聞曹公將來侵作濡須塢十八年曹公攻濡須權與相拒月餘曹公望權兵歎其齊肅乃退

呂蒙從權距曹公於濡須勸權夾水口立塢諸將皆曰上岸殲賊洗足入船何用塢爲呂蒙曰兵有利鈍兵無百勝如敵步騎蹙人不暇及水其得及船乎遂作之曹公不能下而退

魏使曹仁步騎數萬向濡須朱休穆爲濡須督仁欲襲取州上先揚聲東攻羨溪休穆分兵赴羨溪仁進兵距濡須七十里休穆追羨溪兵未到而仁奄至諸將各有懼心休穆喻之曰兩軍交對勝負在將

不在衆寡諸君以謂曹仁用兵孰與休穆耶又千里步涉人馬疲困某與諸軍共據高城南臨大江北背山陵以逸待勞爲主制客此百戰百勝之勢也因示虛弱以誘致仁仁遣子泰攻濡須城分遣常彌乘油船攻中洲仁將萬人留橐皋爲後拒休穆步兵將攻取油船別遣將攻常彌休穆身自拒泰泰燒營而退遂斬常彌臨陣斬溺死者千餘

今廬州治合肥縣

東至本州界七十里自界首至和州四百五十里

西至本州界一百五十里自界首至壽州二百里

南至本州界二百三十里自界首至舒州一百九十里

北至本州界六十五里自界首至壽州三百一十里

東南至本州界一百里自界首至無爲軍一百七十里

東北至本州界三百里自界首至濠州四百二十里

西南至本州界一百九十里自界首至和州一百十五里

西北至本州界六十五里自界首至壽州一百七十五里

右兵家之論曰城有所必爭城有所必攻吾之所以應之者奈何曰深溝高壘待之以必守秣馬厲兵示之以必戰已而魏之合肥吳之濡須所謂必爭之地必攻之城也孫權嘗擁十萬之衆而攻合肥矣

張遼所領財一千人。遼與諸將謀之。及其未合。當逆挫其勢。以安衆心。然後可守也。乃募敢從之士八百人。明日大戰。遼先登陷城。直抵孫權麾下。權大驚。不知所爲。曹公之出濡須也。號步騎四十萬。權止以七萬人拒之。遣甘甯糾手下健兒百餘人。夜斫操營。北軍震駭。此所謂待之以必守。而示之以必戰也。夫以戰爲守。故能以逸待勞。以寡擊衆。此爲兵之要也。今合肥、濡須皆吳境也。論者常以謂兵少不足以用。城埠不足守。苟爲是言。則是必皆懦弱因遁之見也。雖與之太行之阻。濁河之限。亦必委之而去矣。況合肥濡須乎。夫守合肥以限淮北。守濡須以藩江左。則是江淮表裏之勢也。且合肥從古以來。其浸有凍湖肥水。其蔽有新城居巢。濡須在吳志。有羨溪中洲。橐臯其地形俱尙在。但不知必戰必守。今人何如古人爾。

渦口附

曹公伐吳。自渦入淮。出肥水。軍於合肥。

魏文帝循渦入淮。陸道徐進至廣陵。

宋建武末。魏軍圍司州。明帝使徐州刺史□□□拔渦陽以爲聲援。

梁侯景退保渦陽。魏慕容紹宗擊敗之。景自峽石濟淮。說下韋黯。遂據壽春。大通元年。遣領軍曹仲宗。伐渦陽。陳慶之隸焉。魏遣常山王元昭等東援。前軍至馳瀨。去渦陽四十里。韋放曰。賊鋒輕銳。不如勿擊。慶之曰。魏人遠來。皆以疲倦。須挫其氣。必無不敗之理。於是與麾下百五騎奔擊。破其前軍。魏人震

恐慶之遠其諸將連營西進據濡須城與魏相持自春至夏各數十百戰師老氣衰魏之援兵復欲築壘於軍後仲宗等恐腹背受敵謀退慶之杖節軍門曰須虜圍合然後與戰若欲班師慶之別有密敕仲宗壯其計從之魏人犄角作十三城慶之陷其四壘九城兵甲猶盛乃陳其俘馘鼓譟攻之遂破斬獲略盡渴水阻流詔以渴陽之地置西徐州

右淮南之浸有淮水肥水渴水漁水淮北郡縣陽洋成皆依水以立焉晉魏之侵吳必自譙入渴水淮肥以南向今長淮之險僞齊已與我共之矣其窟穴於譙非一日也北譖者言築城渴口然則僞豫之態見矣他日通餽運作樓艦以犯濠壽必此塗出也觀元魏作十三城於渴陽陳慶之以數十百戰盡平除之而後已及賊去乃置西徐州以據之則渴陽是亦南北必爭之地何必渴口凡兩軍犄角一障之間其安危係焉乘勢襲奪每覆軍殺將而不悔也是故魏攻鍾離楊大眼對橋北岸立城以通糧運芻牧者皆爲大眼所掠曹景宗募敢勇士千餘人度大眼城南築壘大眼來攻景宗破之壘因得成使別將趙草守之因謂之趙草城魏人抄掠輒爲趙草所獲又魏人分築東西小城夾肥草叡先攻二城既而魏人援兵五萬掩至叡督戰破之叡先立堰於肥水使軍主王懷靜築城於岸守之魏攻陷城進軍至叡屯下叡督厲衆軍而前魏人鑿堤叡親與爭魏軍卻因築壘以自固壘成營立合肥遂陷此以言之魏不築十三城則無以守渴陽陳慶之攻戰使魏一城尚在則渴陽非梁有也觀之往事以料賊情僞豫之勢變更而南矣朝廷雖務含容未忍出師以聲其罪始量地守險治兵積粟聊有以待之夫

何傷於齊。而惴惴然一不敢爲也。且人治家國城郭中兵。蓋是常事。小小捍禦。而憂僥幸之疑。我豫備竊猖狂。而我獨不疑何耶。

鍾離

魏中山王元英攻鍾離。圍刺史呂義之。梁武帝詔曹景宗督衆軍援義之。頓道人洲。待衆軍集俱進。景宗違敕而進。遇暴風。頗有沈溺。復還守先頓。及韋叡至。與景宗頓邵陽洲立壘。魏連戰不能卻。又度魏城數里築城。使趙草守之。因爲趙草城。

元英圍鍾離。衆兵百萬。連城四十餘梁。武帝詔韋叡與曹景宗會軍。叡自合肥。徑陰陵大澤。旬日至邵陽。於景宗壘前二十里。掘塹植鹿角。截洲爲城。比曉而營立。元英大驚。乃募人潛行水底。齋敕入鍾離東城。令知援兵已至。城中人百其勇。魏將楊大眼來攻。叡結車爲陣。以強弩二千。一時皆發。傷者衆。矢貫大眼右臂。亡魂而走。又與元英戰。一日數合。英憚其強。魏人先於邵陽兩岸爲橋。立柵數百步。跨淮通道。叡裝大艦。使馮道根等爲水軍。會淮水暴漲。叡卽遣之。鬪艦競發。皆臨賊壘。以小船載草灌之以膏。從而焚其橋。風怒火盛。拔柵斫橋。水又漂疾。倏忽之間。橋柵皆壞。道根等身自搏戰。軍人奮勇。無不一當百。魏人大潰。元英脫身遁走。魏軍趨水死者十餘萬。斬首亦如之。其餘釋甲稽顙。乞爲囚奴者。猶數十萬。

涂中

吳孫權遣兵十萬作堂邑塗塘以淹北道。

晉咸和中石勒侵阜陵王導出軍次江甯俄而賊退蘇峻據歷陽孔坦曰宜急斷阜陵之界守江西當利諸口。

今濠州治鍾離縣。

東至本州界五十五里自界首至泗州二百七十里。

西至本州界二百八十里自界首至壽州一百里。

南至本州界一百四十里自界首至廬州九十里。

北至本州界五十里自界首至宿州二百四十里。

東南至本州界一百五十里自界首至滁州七十里。

東北至本州界一百里自界首至泗州一百五十里。

西南至本州界二百二十五里自界首至壽州一百二十里。

西北至本州界一百二十一里自界首至宿州一百九十八里。

今滁州治清流縣古徐中。

東至本州界七十里自界首至真州二百里。

西至本州界六十里自界首至濠州一百六十里。

南至本州界八十里。自界首至和州七十里。

北至本州界一百二十五里。自界首至泗州五十五里。

東南至本州界六十里。自界首至和州九十里。

東北至本州界一百一十五里。自界首至泗州二百里。

西南至本州界一百五十里。自界首至廬州一百二十五里。

西北至本州界七十里。自界首至濠州一百五十里。

右濠州今治鍾離如邵陽洲道人趙草城皆據淮以爲險。南唐陳覺屯濠州築甬道欲與壽春通則鍾離實壽春之蔽也。涂塘卽今涂河漢有阜陵侯邑在滁州西彭超陷盱眙謝石赴救次于途中以知守滁陽則可援盱眙也。以地理志攷之。濠州西至壽春一百一十里西南至壽春一百二十里。滁州北至盱眙一百九十里。東北至盱眙二百一十五里而滁州之西界距濠一百六十里。濠之東南距滁一百九十里。此數州脣齒之勢也。昔石聰攻壽陽朝議欲作滁塘以遏虜寇。章叔屢肥水以攻合肥康絢築浮山堰灌壽陽以拒魏。由此觀之淮南雖無大山絕塞之阻然肥近有滁水或塞或流皆可以禦敵也。

歷陽

吳景守歷陽孫策助景衆五六千渡江轉鬪所向皆破。

蘇峻渡江祖約據歷陽與峻相首尾。

劉牢之討陳敏遣劉機出歷陽敏使錢廣次烏江以拒之

袁真以壽陽叛溫將討之以毛穆之守歷陽謝尚鎮歷陽時欲有事于中原使尚帥衆向壽春

今和州治歷陽縣

東至本州界一十里自界首至太平州三十一里

西至本州界六十九里自界首至無爲軍一百二十里

南至本州界一百一十五里自界首至太平州六十五里

北至本州界七十里自界首至滁州八十里

東南至本州界一百四十五里自界首至無爲軍一百五里

東北至本州界一百五十里自界首至揚州一百七十里

西北至本州界一百一十五里自界首至廬州一百二十五里

右孫策之圖江表也起兵歷陽轉攻秣陵遂定諸郡以成霸業其後蘇峻將襲建業亦濟橫江以刦姑熟蓋王師下江南渡於采石比金人犯順越采石而渡網沙夾蓋網沙江面旣狹於采石而捨舟登岸平原易野此騎兵之地故金人得之遂陷建康然則歷陽者姑熟建康之門戶也其謀師聚兵豈不重哉

新州

東至本州界一百三十五里。自界首至舒州一百五十里。

西至本州界一百一十里。自界首至黃州北十里。

南至本州界六十里。自界首至興國軍一百四十里。

北至本州界一百三十里。自界首至壽州三百里。

東南至本州界二百一十五里。自界首至江州三十五里。

東北至本州界一百二十里。自界首至舒州一百七十里。

西南至本州界六十里。自界首至興國軍一百里。

西北至本州界三百五十里。自界首至光州三百里。

舒州

東至本州界一百八十里。自界首至池州九十里。

西至本州界一百四十里。自界首至蘄州一百五十八里。

南至本州界一百七十里。自界首至和州一百八十里。

北至本州界一百二十里。自界首至廬州一百七十里。

東南至本州界三百二十里。自界首至池州四十里。

東北至本州界一百六十里。自界首至無爲軍二百里。

西南至本州界三百里。自界首至蘄州一百五十五里。

西北至本州界一百二十里。自界首至壽州五百一十里。

黃州

東至本州界九十五里。自界首至蘄州一百一十五里。

西至本州界一百八十八里。自界首至鄂州一百八十五里。

南至本州界五里。自界首至鄂州一百八十五里。

北至本州界三百里。自界首至光州一百五十里。

東南至本州界五十五里。自界首至蘄州一百一十里。

東北至本州界三百三十六里。自界首至光州一百八十里。

西南至本州界五里。自界首至鄂州一百五十里。西北至本州界二百四十里。自界首至安州一百六十里。

右淮西以壽春、合肥爲巨鎮。而蘄、黃、舒三州其地偏遠狹隘。則難以屯重兵。然舒、蘄爲九江之蔽。黃州爲武昌之援。其實緊而不輕也。其備禦之方不必推之前聞。而驗以往事。曩金人及鄂及黃、江西、湖南相繼陷沒。去年秋李橫南歸。斥堠無狀。轉相驚動。以爲寇至。江浙之人岌岌然不自保。則三州之捍信乎甚緊而不輕也。今李成突據漢上。窺竊之志不小。而楊么出沒洞庭。王師屢敗。聞之道路。李成密以

么爲囊橐審爾則萬一乘閒而東成主車騎么主樓艦犯岳鄂斬黃以向江表豈不殆哉備禦之方幸早圖之也。

右淮西以上鎮戍士各隨事有議

右殷浩北伐爲姚襄所敗復圖再舉王羲之與浩書曰保淮之志非曰所及莫過還守長江諸督將各復舊鎮自長江以外羈縻而已羲之之勸浩因長江以固大業又論須根立勢與謀之未晚此言是也至以謂捨淮而保江豈不謬哉且江淮表裏之形雖相距千有餘里然共安共危其實首尾也昔苻堅圍襄陽晉出兵禦之詔謝元發三州人丁遣彭城內史何謙之游軍淮泗以爲形援然則江淮表裏必相須以爲強也孫權出居巢口向合肥攻新城又遣孫韶陸議將萬餘人入沔魏明帝親征未至合肥權遁走而韶議等亦退然則江淮表裏必相恃以爲安也儻專備淮南而輕江左之根本與但守江左而去淮南之藩籬計出於此必兩盡而俱亡爾莫若命大將以守淮屯重兵以保江敵擾淮甸則出銳師而赴救掩上流則詔諸鎮以入援合江淮爲一體制遠近如一人審此則何獨江淮以天下爲一統可也

東南防守利便下

江流上下論

昔楚之興也，國於郢郢，而守黔中巫郡，兼江漢之險而有之，故以區區之國，而常與齊秦爭衡。及三國而後，海內之地分爲南北，故必都秣陵，備淮甸，以犄角北寇。然則國之安危，則繫於上流而已。蓋宗廟社稷雖具在建鄴，而平居無事，千官六師，供億無量，則轉輸之利，固繫於上流。一旦有警，旌旗舳艤，四而赴救，則屏翰之勢又係於上流。故南朝六姓，其強弱之勢，與興亡之所繇，顧上流設施何如耳。且大江之南地形延袤，可撓之處不一。備東，則敵必撓我之西；備西，則敵必撓我之東。隨處設備，則兵分而力屈，苟失於彌縫，則隙多而寇至。厥今之策，奈何？昔紀陵聘魏，文帝問吳之戍備幾何，曰：自西陵至江都五千七百里，又問道里甚遠，難爲固守。對曰：疆界雖遠，而險要必爭之地，不過數四。猶人有六尺之軀，其護風寒亦數處爾。如此，則上流所備可得而言矣。夫荆湖之地爲州十一，而其鎮則江陵、武昌是也。京西道爲州者八，而其鎮則襄陽是也。江西道爲州者十，而其鎮則九江是也。凡畫野分土，必據其津塗而扼其喉衿。今所謂險要必爭之地者，不過江陵、武昌、襄陽、九江是矣。何以明之？江水源山於岷，下夔峽而抵荆楚，則江陵爲之都會，故諸葛亮以謂荆南北據漢沔，利盡南海，東達吳會，西通巴蜀，此用武之國也。嶓冢導漾東流爲漢，漢沔之上，則襄陽爲之都會，故庾翼以謂襄陽西接益梁，與關隴咫尺，北去河洛不盈千里，方城險

峻土沃田良水路流通轉運無滯進可以掃蕩秦趙退可以保據上流者也沅湘衆水合洞庭之波而輸之於江則武昌爲之都會故吳大帝常都於此而東晉宋齊梁陳之際號稱盛府者此也豫章西江與鄱陽之浸浩瀚吞納而匯於溢口則九江爲之都會晉之所謂尋陽北撫羣蠻西連荆郢亦藩任之要者此也今守江陵則可以開蜀道守襄陽則可以援川陝守武昌九江則可以蔽全吳夫蜀漢吳楚併而爲一則東南之守亦固矣至於備禦之處必有輕重措置之間必有緩急比年金人常絕武昌而竦豫章矣李成常寇尋陽而驚江左矣然而此二鎮者於今備禦之處豈不甚重歟日者金人竭力以事隴蜀李成乘閒以入漢上荆南之形已孤而梁洋之道遂塞然則二鎮者於今措置之間豈不甚急歟使其巢窟關中吞食梓益順流襄漢聞出江陵則武昌九江自然震動則是東南之際脈絕而壤斷四分五裂揚越之區其能高枕而臥乎今日之事莫先於下詔以收襄漢增兵以戍荆南收襄漢則興元之阻譬之近藩戍荆南則巴蜀之富還爲外府而又屯武昌而湖之南北可以按堵屯尋陽而江之東西可以衿帶上游之勢也已成矣而後根本建康左右淮浙取資於蜀調兵於陝以天下之半而與敵爭庶乎可以得志矣昔諸葛亮劉備以取蜀結吳跨有荆益周瑜亦勸孫權分以荊州資劉備以發兵爭蜀還据襄陽以蹙曹操北方可圖也由是觀之坐制吳楚通西蜀而守襄陽英雄之資而帝王之業也謹條具如右

襄陽

羊祜鎮襄陽以計分吳罷石城守於是戍遷減半分以墾田八百餘頃大獲其利祜之始至也軍無百

日之糧。及至季年，有十年之積。詔罷江北都督，置南中郎將，以所統諸軍在漢東、江夏者，以益祜。祜在軍，輕裘緩帶，身不披甲，進據險要，開建五城，收資曠之利，奪吳人之資。石城以西，盡爲晉有。自是前後降者不絕。乃增修德信，以懷初附。慨然有併吞之志。每與吳人交兵，剋日方戰，不爲掩襲之計。於是人情翕然悅服，稱爲羊公，不之名也。祜與陸抗，使命交通，抗稱祜之德量，雖樂毅、孔明，不是過也。祜算伐吳，必藉上流之勢，表留王濬監益州，密令修舟楫。祜繕甲訓卒，廣爲戎備。祜上疏云：「今若引染益之兵，水陸俱下，荆楚之衆，進臨江陵，平南、豫州，直指夏口，徐揚青兗，並向秣陵，以一隅之吳，當天下之衆，勢分形散，所備皆急。」巴蜀奇兵出其空虛，一處空壞，則上下震蕩。吳緣江爲國，無有內外東西數千里，以藩籬自恃。其俗急速，不能持久。弓弩戟盾，不如中國。唯有水戰，是其所便。一入其境，則長江非復所固。還保城池，則去長入短。如此，兵不逾時，剋可必矣。晉帝深納之。晉後平吳，皆如祜策。

石勒荊州監軍郭欽，寇襄陽，勒令欽退屯樊城，俱謀還告。南中郎將周撫，以爲勒軍大至，懼而奔武昌。欽入襄陽，軍無私掠，百姓安之。晉平北將軍魏該弟遐，率該部衆自石城降于欽，毀襄陽，遷百姓于河北。城焚城以戍之。王師復戍襄陽，欽又陷攻之，留戍而還。晉大司馬桓溫，統步騎四萬發江陵。水軍自襄陽入均口，至南鄉，步自淅川，以征關中。命司馬勳出子午道，別軍攻上洛，獲符健。荊州刺史郭欽，進擊青泥，破之。健又遣子生與弟雄將兵數萬屯曉柳，愁思地以拒溫，遂大戰。生親自陷陣，溫軍力戰，生衆乃散。雄又與車騎將軍沖、戰白鹿原，又爲沖敗。雄遂馳襲司馬勳，勳退次女媧堡。溫進至灞上，健以

五千人深溝自保居人皆按堵復業持牛酒於路者十八九耆老感泣曰不圖今日復見官軍

符堅先遣楊安寇漢川遣王顥寇蜀遂陷漢中又攻二劍剋之進據梓潼又陷益州於是西南夷邛筭夜郎等皆歸之以揚統鎮成都毛當鎮漢中姚萇鎮仇池頃之遣其尚書令符丕大司馬慕容暐苟池等步騎七萬寇襄陽使楊安將楚鄧之衆爲前鋒石越率精兵一萬出魯陽關慕容垂與姚萇出南鄉苟池與強弩王顯將勁卒四萬從武當繼進大會漢陽次沔北晉南中郎將朱序以丕軍無舟楫不以爲虞石越遂游馬以度序大懼固守中城越攻陷外郭獲船百餘艘以濟軍丕率諸將進攻中城使苟池石越毛當有衆五萬屯于江陵晉車騎將軍桓沖擁衆七萬爲序聲援憚池等不進保据上明堅兗州刺史彭超請率精銳五萬攻彭城願更遣重將討淮淝諸城於是遣俱難毛當毛盛邵保等步騎七萬寇淮陰與超會師而南毛與王顯自襄陽會兵攻淮南

宋隨王誕鎮襄陽柳元景爲後軍中兵參軍及朝廷大舉北伐使諸鎮各出軍誕遣尹顯祖出訾谷魯方平薛安都龐法起入盧氏田義仁入魯陽自訾谷入盧氏元景率軍繼進引軍上百丈崖出溫谷以入盧氏法起諸軍進次方伯堆去宏農城五里元景引軍度熊耳山安都頓軍宏農法起進據澠關方平等向陝元景令諸軍竝造陝下列營魏城臨河爲固諸軍頻攻未拔魏軍挑戰安都奮擊魏軍無不披靡明日大戰破之

今襄陽京西南路

東至本州界六十里。自界首至隨州二百八十里。

西至本州界二百四十里。自界首至房州二百五十里。

南至本州界一百四十七里。自界首至江陵府三百一十里。

北至本州界九十里。自界首至鄧州八十八里。

東南至本州界一百六十一里。自界首至郢州五十六里。

西南至本州界二百三十四里。自界首至峽州二百八十五里。

東北至本州界八十七里。自界首至唐州一百六十三里。

西北至本州界二百五十一里。自界首至均州一百八里。

右孫權初併江南。周瑜、呂蒙、勸權取襄陽以抗曹操。權方力征江湖。日不暇給。襄陽卒爲魏有。魏之攻吳兵來於漢沔屢矣。亦希襄陽之攻。然每戰輒敗。未嘗得志焉。及晉之興。西藩益強。羊祜奪石城以西。招納降附。布德行惠。練兵積粟。規以滅吳之襄陽。迨其後。晉師併吞。果自襄陽始也。及晉室之東。已而爲宋。則襄陽截然爲南北之限矣。其地入南。則坐而可制羈胡。地歸於北。則敵人乘之。動搖江左。是故大司馬溫之領荊州也。決策北征。衆軍發自江陵。道襄陽而入均口。直抵關中。敗郭欽。破符雄。進至霸上。而還。隨王誕之鎮襄陽也。柳元景率諸軍將會於盧氏。薄弦農據潼關。戰于陝下。當是之時。南國之威少震焉。由得襄陽故也。中開江右。未潔逆湖縱橫。石勒以偏師向樊城。周撫望風而遁。襄陽石城沒。

於虜者久之。其後符堅乘陷蜀之勢，舉兵寇襄陽，則江表之兵來，固已可憂。中原之路，無可言者。嗚呼，得失成敗，古猶今也。自神都淪喪，京西諸郡相次從僞，而襄陽孤軍自守，累年于茲矣。躊躇之頃，幾失機會，使賊豫生心，驅斥守將楊兵，據險，傲然有南向之意，豈不甚可惜哉？且金人既殘五路，又窺四川，北豫賊聚於漢上，計其兇狡情狀可知。若襲荆南而當國之上流，或自淮安、開行、新黃，其禍小則爲石勒，大則爲符堅，不知閩外何以禦之？及今謀之，尚有策也。且二大將駐軍江渚，去賊千里，安所防扞？與其坐待，不若雙討，儻移池陽之屯，列於鄂岳，起九江之兵，入于漢沔，破除楊么，追擊李成，鎮撫襄鄧，且耕且戰，跨荊益漳湖而逼京路，在此一舉也。夫棄襄陽而成江南，則我盡力以備僞齊，猶恐無益。守襄陽而臨京西，賊豫亦將奔命而備，我可以獲利。且人之情，甯備人耶？甯使人備己耶？曰：備人者，制於人；使人備己者，制人。制人與制於人，不可同年而語矣。

郢州附

按齊梁郢州治夏口。今郢州古石城也。

柳世隆爲武陵王長史、江夏內史，行郢州事。沈攸之反，遣孫同等三萬人前驅，又遣司馬冠軍、劉讓等二萬人次之。又遣王靈秀等分兵出夏口，據魯山。攸之乘輕舸，從數百人先大軍住下白螺洲，有自驕色。既至郢，以郢城弱小，不足攻，攸之將去。世隆遣軍於西渚挑戰，攸之果怒，晝夜攻戰。世隆隨宜拒應，衆皆披郤。

張宏策說蕭懿曰：「郢州控帶荆湘，西注漢沔，雍州士馬呼吸數萬，時安則竭誠本朝，時亂則爲國剪暴。」

如不早圖悔無及也。

今郢州治長壽縣

右襄陽之北有樊城石勒嘗令郭欽襲據以逼漢沔去襄陽三百里界有馬閣崔慧景嘗以四萬人攻之乃陷至於鄖中沔上皆前世攻守之處也然以古今地形較之惟郢城爲重羊祜謀伐吳先侵石城以奪吳人之資梁武帝起兵襄陽張洪策說蕭懿早圖郢州蓋郢之封域三面皆通江陵其西抵襄陽僅百餘里今經緯漢上鎮襄陽必以郢州爲蔽也

江陵按漢末荊州治襄陽

荀彧勸曹操先取河北南臨荊州既破單于公孫康斬送袁尚首遂直出宛葉以征劉表會表死其子琮舉衆降劉備聞之遽走操以江陵有軍實恐先主據之乃釋輜重輕軍到襄陽至當陽長坂大鬪艦乃以千數操卒悉浮於沿江兼有步騎水陸俱下號八十萬劉備會諸葛亮求救於孫權權納周瑜魯肅之議遣兵三萬人逆操遇於赤壁時操軍疾疫戰不復利船艦俄爲吳人焚爇引軍而退留曹仁等守江陵徑自北歸蜀先主客於荊州劉表益其兵屯於新野詣諸葛亮論天下事謂曹操已擁百萬之衆挾天子而令諸侯不可與爭鋒孫權據有江東已歷三世國險而民附賢能爲用可與爲援不可圖也荊州用武之國而其主不能守此天所以資將軍也益州天府之土高帝因之以成帝業劉璋暗弱可并有之跨有荆益保其險阻西和諸戎南撫夷越外結好孫權天下有變則命一大將將荊州之

衆以向宛洛身率益州之衆以出秦川如是則霸業可成漢室可興矣及劉表卒子琮降曹公先主將其衆去之荆人多歸先主衆十餘萬輜重數十輜別遣關羽乘船數百艘使會江陵未至曹公先已據之先主棄妻子與諸葛亮數十騎斜趨漢津適與羽船會得濟河又得表長子琦兵萬人俱到夏口遣諸葛亮結於孫權權遣周瑜等水軍數萬與先主併力破曹操於赤壁曹公引兵歸先主表琦爲荊州刺史又南征武陵長沙零陵桂陽四郡琦病死羣下推先主爲荊州牧治公安權因以荊州借之益州牧劉璋遣法正迎先主爲益州牧孫權使來欲得荊州先主無還意會權怒遣呂蒙取長沙零陵桂陽先主引兵下公安令關羽入襄陽是歲曹公定漢中先主聞之與權連和建安二十四年關羽攻曹仁禽于禁于樊權襲殺羽取荊州明年先主帥諸軍伐吳吳將陸遜屯秭歸先主率海將緣山截嶺於夷道駐軍與吳人相拒于夷陵先主大敗收合離散棄船由步道還永安劉表死魯肅說孫權曰夫荊楚與國鄰接水流順下外帶江漢內阻山險有金城之固沃野萬里士民安富若據而有之此帝王之資也今表新亡二子素不輯睦軍中各有彼此加劉備與操有隙客寓於表表惡其能而不用也請得奉命弔表二子并慰勞軍中用事者及說劉備使撫表衆同心一意共拒曹操備必喜而從命如其剋諸天下可定也今不速征恐爲操所先權遣肅行到夏口聞曹操已向荊州晨夜兼道比至南郡而表子琮已降曹操劉備遑遽奔走欲南渡江肅與備會宣權旨及陳江東強固勸備與權併力備遣亮使權肅亦反命會權得曹公欲東之間與諸將議皆勸迎之惟周瑜魯肅定計擊操與劉備俱進攻操於

赤壁操北還留曹仁徐晃於江陵使樂追守襄陽瑜又破曹仁遁去瑜屯據江陵劉備領荊州牧治公安瑜上疏諫不可而魯肅勸借之以拒曹公操聞權以土地借備方作書落筆於地後備定蜀權令諸葛瑾從求荊州諸郡不許曰吾方圖涼州定乃盡以荊州與吳耳權曰此假而不反欲以空辭引歲遂置南三郡長史關羽盡逐之權大怒乃使呂蒙等取長沙零陵桂陽三郡使魯肅屯巴邱以禦關羽權住陸口爲諸軍節度又併兵備羽於益陽未戰備請和許之後三年關羽虜于禁等權內憚羽欲以爲己功牋與曹公乞討羽自効先遣呂蒙襲公安降南郡太守蒙據江陵陸遜別取宜都獲秭歸枝江夷道還屯夷陵守峽口以備蜀關羽自麥城遁走潘璋斷其徑路獲羽及其子平建安二十五年劉備帥軍來伐至巫攻秭歸誘道武陵蠻夷於是諸縣反皆爲蜀權會陸遜督朱然潘璋等以拒之蜀軍分據險地前後五十餘營遜隨輕重以兵應拒自正月至閏月大破之臨陣以所斬及投兵降者數萬人備奔走僅以身免

今江陵府

治江陵縣
係湖北路

東至本州界五百七十五里自界首至鄂城一百五十五里

西至本州界二百五里自界首至峽州七十五里

南至本州界一百九十里自界首至豐州七十里

北至本州界二百九十里自界首至襄州一百五十里

東南至本州界三百五十里。自界首至岳州六十里。

西南至本州界三百六十里。自界首至豐州六十里。

東北至本州界一百六十五里。自界首至安州二百八十里。

西北至本州界三百六十五里。自界首至襄州一百七十里。

右江漢在秦漢以前蓋荆蠻之地也。其形勢豈足以爲天下之重輕也哉。漢末劉表據有荊州地險而人富表區區自守無復遠圖故海內英雄陰拱而竊睨將拊其背而奪之。孔明之勸元德魯肅之說仲謀文若之啓曹公未嘗不指荊州而爲言也。及劉表旣死魯肅奉命疾馳欲慰安劉琮會挾元德以禦曹操孔明則以爲攻劉琮則荊州可有肅未及境元德遲疑不斷之閒而曹公已臨荊州矣元德乃遣亮求救於吳吳人與之併力以拒北軍曹公得表之士衆因表之船舫順流而下喟然有貪江濱之志以周瑜總偏師破之赤壁曹公大敗引兵而退吳人亦自以爲有荊州矣元德因表劉琦爲荊州刺史且南征以取四郡適會琦死羣下推備荊州牧治於公安吳不得已以土地假備共拒曹公先主得此資也西入巴蜀襲劉璋以成霸業遂於倍約兼南郡而有之無還吳之意也蜀人亦自以爲得荊州矣俄而吳發兵進江陵擒關羽而殺之先主與吳爭乘危騁變上下千里陸遜破之西陵先主敗沒絕命永安而後荊州之地多入於吳天下於是始南分焉蓋荊州之境所包者遠始時魏武分南郡以北立襄陽郡分南郡西界立南鄉郡分枝江以西立臨江郡及敗而歸吳之所得者南郡而已吳與蜀分荊

州也。南郡、零陵、武陵、以西爲蜀。江夏、長沙、桂陽、三郡爲吳。南陽、襄陽、南鄉、三郡爲魏。則荊州之地，瓜分豆剖，拆而爲三。然蜀終不能有宜都、武陵、零陵、南郡，故覆師敗國，而終以無成矣。魏固守襄陽、南陽、南鄉，故更出迭入，常爲吳患。吳佔荊州之什七也，而又專事江陵、公安，故西備蜀，北備魏。魏備蜀雖強，亦無柰吳何。蓋形勢使之然也。迨晉平蜀，以綏吳之西，料理襄陽，以擾吳之北，以攻巫峽，下江陵，而吳國爲墟矣。由此推之，荆楚之國，乍離乍合，吳魏蜀之強弱繁焉。何如此之以古揆今，理或然也。夫金人之寇蜀夔峽，則江陵之西已病矣。劉豫之拔襄陽，則江陵之北且危矣。然零陵、桂陽、長沙、江夏，幸無恙也。若亟守江陵，按湖之南北，西援巴蜀，北收襄陽，則病可起而危可安焉。不然，則賊出襄陽，距江陵五驛而近，越江陵而下峽，不能數百里。事至此，誠恐東南之憂，不但東南而已。夫不守江陵，則無以復襄陽。不守江陵，則無以固巴蜀。不守江陵，則無以保武昌。今而不圖，後無日矣。嗚呼，江陵、公安，此三國之君虎視龍戰，叱咤踊躍，惟恐失之者也。今荊南尙爲吾土，不折一戟，不殺一民，可指揮而定，乃釋而不爲。若英雄之人，有先我而起者，何以待之？襄陽之事，可以戒矣。

夷陵附

蜀先主率大衆來向西界，孫權命陸遜、督朱然、潘璋等五萬人拒之。備從巫峽建平連圍至夷陵界，立數十屯，誘動諸夷，使馮習爲大將，張南爲前部，趙融等各爲別督，先遣吳班於平地立營挑戰，諸將皆欲擊之。遜曰：「此必有譖，且觀之。」備知其計不可，乃引伏兵八千從谷中出。遜曰：「所以不聽諸君擊班者，

揣之必有巧故也。上疏曰：夷陵要害，國之關限，雖爲易得，亦復易失。失之非徒損一郡之地，荊州可憂。今日爭之當令必譖。臣初嫌其水陸俱進，今舍船而就步，處處結營，察其布置，必無他變。遜瑜諸將，犄角此寇，政在今日，乃先攻其一營，不利。諸將曰：空殺兵耳。遜曰：吾已曉破之之術，以火攻之，易爾。勢成通率諸將同時俱進，斬張南、馮習及胡王沙摩阿等，破其四十餘營。備因夜遁，僅得入白帝城。其舟船器械、水步軍資，一時俱盡。尸骸塞江而下，備大慙曰：吾乃爲遜之所折辱，豈非天耶？

今峽州治夷陵縣

東至本州界，七十五里。自界首至江陵府，二百六十五里。西至本州界，九十五里。自界首至歸州，一百五里。

南至本州界，一百三十五里。自界首至江陵府，一百九十五里。北至本州界，一百九十里。自界首至襄州，三百八十里。

東南至本州界，二百四十五里。自界首至灋州，一百二十里。西南至本州界，七百六十里。自界首至施州，二百一十里。

東北至本州界二百五十里。自界首至襄州三百三十里。
西北至本州界一百五十里。自界首至歸州一百二十里。

右晉書南史載江陵戰地則有赭圻、鵠尾、錢溪、濃湖。其障塞則有公安、上明。此不過四封之內戍邏遮列而已。藉令措置疏闊，乘敵而入，其受患尚淺也。如其要害實在夷陵，人以爲國之西門。若有不守，非但失一郡，則荊州非吳有也。觀陸遜之拒劉備，循定策守常險，故能以寡敵衆。及晉師順流而下，江陵遂沒。夏口武昌無復支抗。彼王濬豈賢於劉備？夷陵江山詎減昔時？守與不守，其勝敗存亡相絕有如此者。夫陸遜之鎮夷陵，有兵五萬，及吳之衰，見兵有數萬人。陸抗以爲深戚。今峽州孤戍弱卒，殆成兒戲，豈其守將乃勝於抗遜輩耶。

長沙附

右孫權與蜀分荊州，長沙以東屬權。杜預以平江陵而沅湘以南望風歸命，然則長沙亦荆湖之都會。其戍備庸可忽耶？昔宋武分荊州立襄州，以張邵爲刺史，將立府。邵以爲長沙內地，非用武之國，置府妨人，乖爲政之要。如邵所論，則守江陵足以蔽長沙，而守長沙不足以固江陵。此又不可不知也。

武昌

孫權自公安都鄖改名武昌，以武昌、下雉、尋陽、陽新、沙羨、柴桑六縣爲武昌郡。權東巡建鄴，留太子、皇子及尚書九官於武昌。召陸遜輔太子，并掌荊州及豫章三郡事。董督軍國諸公子有過，遜輒裁之。身

在外乃心於國上疏陳事皆有補益權欲取夷洲朱崖伐公孫淵每以啓遜遜必諫止又與諸葛瑾攻魏之襄陽擊江夏新市安陸石陽大有剋獲後代顧雍爲丞相其州牧都督領武昌如故遜卒後諸葛恪代遜權乃分武昌爲兩部呂岱督右部上至蒲圻

陶侃遷龍驤將軍武昌太守時天下饑荒山夷多斷江劫人侃之諸將詐作商船以誘之斬數十人自是水陸肅清流亡者歸之盈路又立夷市於郡東大收其利帝使侃擊杜弢侃令周訪趙誘爲前鋒兄子與爲左翫擊弢破之時周顥爲荊州刺史先鎮尋水賊掠其戶口侃使其部將朱伺擊之賊退保溢口侃謂諸將曰此賊必更步向武昌吾宜還城晝夜三日行至武昌使朱伺逆擊大破之拜荊州刺史領西陽江夏武昌鎮于沌口又移入沔江後周訪等進軍入湘使楊譽爲前驅擊杜弢又大破之王貢以精卒三千出武陵誘五溪夷列舟師斷官運徑向武昌侃使鄭奉陶延夜趨巴陵潛師掩其不備斬千餘級降萬餘口王貢遂來降而弢敗走其後領南蠻校尉征西大將軍荊州刺史蘇峻作逆舉兵入援峻平侃旋江陵偏遠移鎮巴陵侃復領江州刺史旋巴因鎮武昌侃雄毅有權略明悟善決斷石勒聞其禽郭默默在中原數與勒戰賊畏其勇侃之討默兵不血刃而禽也勒益畏侃侃之在鎮自南陵迄于白帝數千里中路不拾遺

今鄂州江夏縣武昌軍節度治江
夏縣武昌在州東一百里

東至本州界二百里自界首至興國軍八十八里

西至本州界三百八十八里。自界首至岳州二百六十里。
南至本州界三百四十六里。自界首至岳州一百八十里。

北至本州界四十二里。自界首至黃州九十五里。

東南至本州界三百四十六里。自界首至岳州一百八十里。

西南至本州界三百六五十里。自界首至江陵府三百一十里。

東北至本州界四百七十二里。自界首至江陵府五百一十里。

西北至本州界四十二里。自界首至黃州一百五里。

右秦取鄖郢爲南郡。漢初分南郡爲江夏。孫權分江夏立武昌郡。晉惠帝分桂陽、武昌、安成三郡爲江州。則是武昌在秦則包於南郡。在漢則包於江夏。在晉則或隸江州。或隸荊州。觀之地形。武昌江湖之衝也。西扞郢。南拒岳。西南據江陵。取南鄙九江。表裏扞蔽。最爲強固。故陸遜輔太子掌留事。及拜丞相。而都督武昌。不改舊職。則武昌其爲重地可知矣。陶侃於沌口。又移入沔。及西征。移鎮巴陵。復移鎮武昌。然則侃在軍四十餘年。內屏王室。外禦強寇。其功烈可紀者。終始皆在武昌。則武昌之形勢要劇。不減於襄陽江陵也。

巴陵。按周瑜初鎮巴邱。今撫

崇仁縣非巴陵也。

周瑜定豫章廬陵。留鎮巴邱。

東南防守利便 下

杜預開揚口起江夏水達巴陵千餘里內瀉長江之險外通零桂

今岳州治巴陵縣

右杜預云巴邱沔湘之會表裏山川實爲險固陶侃征西巴陵巴陵與武昌蓋輔車之勢也然征西自沔江陵在鄂州之北幾五百里其地雖云次緊屯兵守隘非江夏比也

江州按江州晉初治武昌後治尋陽舊在江北柴桑其徙治也

元帝遣周訪屯彭澤以備華軼訪曰彭澤江州西門也今以兵守其門將成其釁尋陽故縣既在江西可以扞禦北方又兼嫌於相逼也帝會王敦督訪等討之軼所統武昌太守馮逸次于溢口訪擊敗之溫嶠代應詹爲江州刺史持節都督平南將軍鎮武昌又陳尋陽濱江應鎮其地劉毅表江州在腹心之內應接揚豫藩屏所寄實爲重複宜解軍府移

今江州治德安縣故柴桑也

東至本州界二百一十里自界首至饒州九十里

西至本州界一百五十里自界首至興國軍二百五十里

南至本州界九十里自界首至南康軍三十里

北至本州界二十五里自界首至蘄州二百七十五里

東南至本州界三十里自界首至南康軍六十里

西南至本州界、四十五里。自界首至洪州、一百五十五里。

東北至本州界、二百七十五里。自界首至池州、二百五里。

西北至本州界、二十里。自界首至蘄州、一百七十五里。

右晉惠帝元康元年，有司奏荆揚二州疆土曠絕，統理尤難。於是割揚州之豫章、鄱陽、廬陵、臨川、南康、建安、晉安、荊州之武昌、桂陽、安成、合十郡，因江水之名而立江州。永興元年，分廬江之尋陽、武昌之柴桑、二縣置尋陽郡，屬江州。元帝渡江，江州又置新蔡郡。尋陽郡又置九江、上甲、二縣。尋又省九江縣入尋陽。義熙中，省尋陽縣入柴桑縣。柴桑仍爲郡。其廢興蓋如此。然則晉江州所領，兼今之江東西、湖南北、十州之地。南朝因而不改。其提封遠矣。故常以貴王大臣爲都督，爲刺史。其兵力稱是也。然沿江必守之地，不過尋陽、溢城、數處而已。今江州卽尋陽帥也。彭澤、溢城，皆在邦域之中，命將列戍，控扼上流，藩屏建鄼，可謂重矣。且江邊孤危，非可單軍獨能保固。宜斟酌晉宋而爲之制也。

豫章附今洪州

劉毅領江州都督表曰：軍州在腹心之內，憑接揚豫，藩屏所恃，實爲重複。昔胡寇縱橫，朔馬臨江，抗禦之宜，蓋權時爾。今江左區區，戶不盈數千萬，地不逾千里，而統旅鱗次，未獲減息。況乃地在無虞，而猶置軍府文武將佐，資費非要，愚謂宜解軍府，移鎮豫章。

右江西大使管治尋陽矣，頃復移鎮豫章。以沿江形勢言之，溢城、彭澤，足制上流。內藩建鄼，今爲要地。

豫章立府。其地斗絕。非臨江抗禦之宜。昔人以謂十郡之中。良是。至於戍備多事之時。豈如尋陽。若統督江州。兵多食足。則豫章還爲內地。可關地而臥也。

江南東路州七。宣、徽、池、饒、信、撫、太平府一。建康軍二。建昌、廣德縣四十八。

江南西路州六。洪、虔、吉、江、袁、筠、撫、臨江八府。興國、南康、安縣四十七。

淮南東路州八。揚、永、楚、泰、泗、滁、真、通四府。長天縣二十。

州二。宿、亳、州十九。昭、鶴境。

淮南西路州七。壽、廬、贛、和、舒、濠、黃、軍一。無爲縣二十六。

州一。光、州四、陷、鶴、境。

荆湖南路州七。潭、衡、永、郴、全、邵、道、監。桂陽縣二十三。

荆湖北路州九。鄂、安、岳、鼎、澧、咸、歸、辰、沅、府一。荊南縣四十五。並、陷、鶴、境。

京西南路州。府一。襄陽。

軍一。

京西北路府一。

州七。

軍一。

縣四十五。並、陷、鶴、境。

京東府州軍一十七。

縣七十八。並、陷、鶴、境。

兩浙路府州軍一十五。

縣七十九。

福建路州六

軍二

縣四十五

廣南東西路州三十八

軍三 縣一百

四川府州軍監五十四

縣一百七十九

陝西府州軍三十五

縣一百一十九

以上諸路州縣總爲東南中興基業各隨事有議右昔楚之封於荆山不滿百里之地惟繼嗣賢能廣土開境遂據荆揚至于南陽傳延世祚九百餘年句踐之國於會稽也南至于江北至于禦兒東至于郢西至于姑蔑卒禽夫差以成霸業今東南形勢合淮浙江湖閩廣陝蜀絕長補短袤數千里自三國之吳若晉宋而下未之有也然則中興之業所乏者豈土地耶或謂今之所患者三戍備既多軍旅猶闕攻戰不息而戎馬未蕃江湖雖險而船舫不治以守則不固以戰則不利其然乎其不然乎曰此何足爲患吳起曰以一擊十莫善於隨以十擊百莫善於險以千擊萬莫善於阻且符堅之南侵也至壽春蓋一十五萬而謝元以八萬人拒之曹操出濡須也步騎號四十萬而孫權以七萬人應之蓋重山積險則寡可敵衆然則軍旅之猶闕非所患也太公曰所從者隘入者隘所從者去遠此騎之末地也天澗深谷翳蒼林木此騎之竭地也洿下漸澤進退沮洳此騎之患地也故孫策之初起兵纔千餘馬數十四吳之大將領兵二千人馬不過五十匹而已蓋彼江負海則騎不如步然則戎馬之未蕃亦非所患也惟是江海之間舟楫之便周瑜嘗論之矣汎舟舉航朝發夕到上風勁勇所向無敵又以謂

舍鞍馬與吳越爭衡本非中國所長是則江邊之戍水上之軍以我之長攻敵之短勝負可見矣昔劉表之守荊州治鬪艦千數今東南之盛不止一荊州也吳之末世舟船凡五十艘今國家之力何遠不若吳耶直不爲爾則舫船之不治又非所患也夫軍旅可益而使之衆也戎馬可養而使之強也船舫可修而使之備也今之所不若古者特存乎其人爾使任得其人吏稱其職則此三者皆有司之事何足以煩廟堂而徹冕旒也善乎陸機之論吳之所以興也大皇帝疇咨俊茂好謀善斷故異人輜輶猛士如林於是張昭爲師傅周瑜、陸遜、呂蒙、魯肅之儔入爲腹心出爲股肱謀無遺算舉不失策故遂割據山川跨制荆吳而與天下爭衡矣嗚呼美哉雖然區區之吳惡可以擬諸盛明且自古中興之主莫如宣王之治論宣王之治不過於內修政事外攘夷狄而已然此其治之迹非其治之道也宣王以內治而修政事以外治而攘夷狄豈他術哉得仲山甫爲之佐而召虎、方叔、南仲、張仲數人者與之同心戮力以底于成周宣王之所知惟知任賢使能而已夫惟任賢使能以宣王爲法此混一而光被之策也

此書爲南宋邊防要典在我皇清一統金甌萬億年亦何所用之然近海之區鮫涎鱻沫豈能永靖即如順治己亥京口之警幾爲東南大患幸朝廷鴻福卽時殲除則思患預防此書固未可以覆瓿視之也康熙丁酉仲秋之望秀水陶越艾村書于素心居



略 紀 邊



撰 曉 鄭

本館據百陵學山
本影印初編各叢
書僅有此本

邊紀畧一卷

海鹽淡泉鄭曉室甫

居庸諸關本太行山與鴈門諸山相斷數百里雁門亘南北太行絕東西表裏縱橫左右繁帶閼狄藩華時用大矣夫重險由乎天造掌固存乎人謀自古在昔墜壞多矣得道乎哉失道乎哉

居庸號北門山形左轉盡漁陽盧龍當山海之際爲榆關控約遼東西右循太行西南以往包絡數十城皆平原沃野北連上谷雲中皆宿重兵表裏維固眞天險哉

西山自井陘西地數百里崇岡複嶂扼爲居庸迤邐

東折玉帶神嶺諸山若拱若抱七陵在焉外拒四海
治潮河川古北口去虜不遠備守其可忽諸

居庸東去舊有松林數百里中有間道騎行可一人
卽札八兒導元兵趨南口者今以供薪炭荐伐條枚
林木日疎薄樹渠藩塞豈無謂邪

紫荆倒馬二關隘口旣多守備不能專內連中山保
塞澶淵古燕趙之郊平夷曠衍無高山大陵爲之限
隔騎兵便馳逐南並井陘接山西路險隘士馬不能
成列東更鉅鹿邢洛遂入齊魯已巳之難虜有謀奪
紫荆窺臨清者不有節庵司馬殆矣而謂國不以人

哉

鴈門稱絕險虜入大同川二邊不能守則雁門當其衝矣幽燕之兵出紫荆繁其左延寧之兵度黃河拂其右虜可邀也昔李牧守鴈門誘匈奴入張左右翼擊之大捷

寧武諸營堡不堪險隘虜往往由蕎麥川野猪口等處入媯女畜產驅逐已出塞而老營遊兵方百里赴援難矣

偏頭地平可馳馬故多虜患西北東備河西東北時備大同川

鴈門三關之山東起代郡外斷雲中內畧太原北境西盡雍河之濱

遼東西

遼東青分營州
西冀分幽州

渤海碣之否外一都會也西南

起山海歷醫無閭長白諸山經絡北東南走海上海

薄蓋金以西接盧龍可渡登萊泛吳浙

金州旅海運
陸順口州梁

房口路蓋
海舟入遼地饒魚鹽穀馬馬給吏士或市之葆塞奚

夷彼遂狹以邀我我亦以官市糜之而奸闌出入亦

不能盡禁寧遠東西兩屯頗安給錦義地瘠寡生理

廣寧無屯營之利率仰給轉粟與遼陽隔河河兩濱

防虜遼陽以北益聚兵兵食益窘開原三城

中固汎河三

面受敵六堡雖復二虜輒巢清陽鎮夷間聚而謀我

我失漁樵之利又掠我男女易畜產二江外

松花
黑龍否

卽繫之耕織日夜無休時西馬市廢蒲河懿路殘破

不可言撫順通百夷貢市內外皆山多伏虜我難於

斥望潘陽雖有關上

撫林

虜馳牧外險內夷不能援鳳

凰壁戰東陲鴉鶻鎖鑰西境並海四州恃得勝之捷

無海寇然遼水南注海溢不能洩患苦沮洳矣

薊州諸山關無慮數百西接居庸北折而東南抵海

上盡漁陽盧龍塞皆其管內船泛登萊路走趙魏肩

肘奚達襟帶原澤馮翊京師號稱雄鎮又地壤深厚

樹畜魚鹽黍稷之利甲於圻內天壽山七陵在焉予嘗謁長陵登山北望邊關可順風而呼也己巳之變祠官不能至昌平陵衛吏卒如僑寓增埤繕障於斯爲急喜峰稍深峻山海肩鑰遼東西燕河太平寨馬蘭峪密雲四營聲勢相接虜卽入中兩營當有衝燕河密雲相掎角遵化三屯建昌固其內防永平梁城間無虜患亦無海寇薊州轉布粟遞洋猶海運也興營諸衛初隸北平行都司列守大寧大寧在諸關山外西北接宣府東北抵遼陽千里山麓水厓可盧而居旣挈其地界山戎我遂失外險山戎故篠塞北結

媚大種闕我東鄙慎哉慎哉

高皇帝永清四海傳檄驅胡魏鄂逐于前宋涼蹤于後當是時胡運已衰然猶伏我障圉掩我將校 皇子元侯作鎮開府周匝三垂選練士馬日夜防警羽檄南馳殆無虛日 高皇帝垂訓 後皇時備西北猷慮遠矣靖難之後臚胸挫跌五帥不還 文皇赫怒伏鉞四征雖嘗蹂虜庭降名王俾其輜畜而我之財力亦已大窘至于末歲猶議勤兵廷臣力阻 上意益堅司徒匏繫于掖庭本兵雉經于私第榆木之變雖悔曷追 宣宗時出近郊大蒐講武嘉峯之役

薄伐山戎而已正統十餘年間貢使往來好語相悅
謾和親于漢姬委賜物于宋幣戎心狡焉覬覦非望
重以奄寺鳴張柄臣首鼠垣墉旣濬羈勒弗虔卒致
六師失次將相輿尸輶馬被遞四郊多壘三陵徹祀
萬雉幾搖賴天之靈 景皇知人善任文武大臣艱
難宣力禹鼎遄歸堯封如故虜亦散亂叛弑相尋我
得寧輯顧其書詞桀傲使介驕凌稍示包荒治以不
治爾天順時我懷平城之敵虜邏呼韓之隙雖有寇
掠亦能捍禦迨至成化諸酋競起分部爭雄各據水
草殘我邊郡河套沃土棄為虜巢威寧之捷足稱敵

愾顧茲譏口反謂貪功刀筆因而舞文干城爲之解體不惟大寧興和開平已非我有朔方河南亦非職方之舊而河西遼東徼外城郭諸國堡塞奚夷漸示攜貳於是並塞萬里所在將屯官益多力益分財益匱中國益困以故弘治初年頗搜往牒謂洪武永樂皆嘗遣使穿廬至屢書勅錫之綺繡糜以官封苟駕馭有方彼狃其餌吾峻其防亭堠不驚耕牧自便遲以數年虜將耗鈍我益富強此計之得者也於時許進行之大同三年三貢費纔十餘萬金大同東西五鎮皆無虜患已而議者又謂虜入邊塞經關隘扣關

庭知我地利闢我兵力普化也先前車不達我是以閉關却貢專意內修已未庚申妖纏昂畢上谷雲中慘被荼毒孝宗發憤召見公卿卽議征討劉大夏面陳利害僅遣桺棘之師坐收薇杜之績不然幾考庚寅之故不貽己巳之憂乎比至正德河東陝西鴈門以北歲有虜患隱敗冒功上下欺蔽脩攘無策盜賊四起宗藩再變今上躬神聖之資乘鼎革之會順治威嚴化洽內外蠢茲醜虜曾何足慮或謂近日諸虜解讐結好更入迭出罷我奔命且進退分合頗有紀律而又納我逋人巧為間諜混迹市蜃至窺京

旬往歲越大同逾鴈門經太原掠上黨闖平陽近復
度紫荆逼居庸秦中隴西去京已遠卽殺掠人畜數
萬不以聞也乃役役焉議兵食戰守通貢互市示其
細耳嗟乎三代之盛漕輶未及於江南五季以還門
檮不施于薊北漢開疆于衛霍唐蹙國于安史豈若
我朝山川綱繆已得天險營鎮聯絡更盡人謀節
其貢賦有恒足之財總其紀綱無專命之吏蓋自生
民以來未有盛于今日者也善爲國者特加之意
而已

卷完



中華民國二十六年六月初版

*E九一九

解

編主五雲王

編初成集書記

種一他其及便利守防南東

發行人

王 上海河南路
雲 南路
五

印刷所

商 上海河南路
務 印書館

發行所

商 上海河南路
務 印書館
上 漢及各埠
印書館



3
4
13225